

戶口考

歷代戶口

號牌

奴婢

文獻備考

東國文獻備考卷之一百七十四

校正

戶口考一

有國斯有民有民斯有戶有戶又必總其口而計之重天民也周禮之拜民數夫子之式負版以是歟然口之生由於天而所以全安之使其增殖者亶係於代天司牧者撫字之如何耳我東視中華風氣晚開檀箕之際雖曰聖世山林鳥獸之間民數豈其蕃乎三國之戶畧見東史麗朝無徵以我朝太宗時所

錄者推之勝國之凋弊可知世稱國朝豐熾之際輒曰穆陵而秘乘難窺無得以詳自是百有餘載休養生息與天同大式至于今版籍所載實我東肇判以來所未有也昔魯僖公養馬坰野思馬斯臧詩人羨之曰思無邪夫馬蓄物也其臧必有待於君心之正而況天民之重日蕃月息其不由我聖上萬化之源哉夫子答冉有曰既庶矣富之既富矣教之將欲教之必先考其庶矣此聖人道千乘之法也於是述戶口考第十六凡三卷

歷代戶口

周史曰昔箕子率中國五千人入朝鮮其詩書禮樂醫巫陰陽卜筮之流百工技藝皆從而往焉後人詩所云半萬殷人渡遼水是也

補 秦二世時天下亂燕齊趙民數萬口亡歸朝鮮

補 三國志減戶二萬

減君南閭等率二十八萬口詣遼東內屬于漢即

漢武帝元朔元年也

詳見輿地考

補 右渠未亡時其相歷谿卿以諫不用東之辰國民之隨居者二千餘戶

箕準為衛滿所攻走入海居韓地金馬郡是為馬韓
統五十餘國大國萬餘家小國數千家總十餘萬戶
辰韓在馬韓之東自言秦之亡人避役入韓韓割東
畧以與之又自弁韓不知其始祖而屬於辰韓辰弁
二國各統十二國大國四五千家小國六七百家總
四五萬戶

補三國志扶餘戶八萬

補又曰東沃沮戶五千

新羅儒理王十四年樂浪人五千與帶方人來投分
置六郡

補儒禮王十年移沙伐州豪民八十餘家實沙道城

補奈勿王十八年百濟禿山城主率三百人奔新羅

王納之百濟王移書請還之不聽

詳見朝聘考

補炤知王十三年百濟民飢亡入新羅者六百餘家

補智證王十五年置小京於阿尸村徙六部及南地

人戶充之

補真興王十九年徙貴戚子弟及六部豪民以實國

原

補文武王六年高勾麗貴臣淵淨土率從官二十四

人以城十二戶七百六十三口三千五百四十三授

新羅新羅分置中外

補九年高勾麗庶子安勝率其衆四千餘户來降

補神文王五年置南原小京徙諸州郡民居之

補高勾麗大武王二年百濟大旱民飢東北部落亡

入高勾麗者千餘户

補五年扶餘王帶素笏率萬餘人來投高勾麗置椽

邦部

詳見輿地考

補閔中王四年南邊蚕乞部落大加戴升等萬餘家

詣樂浪投漢

補故國川王元年其兄投奇惡為兄而不得立將下

户三萬餘口奔于公孫度

補山上王二十一年漢平州人夏瑤以千餘家投高
勾麗置柵城

補西川王十一年遣達賈伐肅慎遷六百餘家於扶
餘南烏川

補爰川王三年王侵玄菟郡虜八千人移于平壤

補十四年侵樂浪郡虜男女二千餘口

補二十年慕容廆遣其將張統擊擄高勾麗將如拏
于河城俘其衆千餘家歸于棘城

補故國原王十二年燕王慕容皝伐高勾麗虜男女

五萬餘口而去

補故國壤王二年遣將擊陷遼東玄菟郡虜男女一萬口而還

補九年伐契丹虜男女五百口又招諭本國陷沒民口一萬而歸

補廣開土王元年伐契丹虜男女五百招諭本國俘民一萬而歸

補九年燕王慕容盛來侵拔新城南蘇二城徙五千餘戶而去

補長壽王六十三年伐百濟漢城虜男女八千而還

補文咨王九年百濟大旱民飢人相食羣臣請發倉
王不聽漢山民亡入高勾麗者二千人

補二十二年侵百濟陷加弗圖山二城虜獲男女一
千餘口

補陽原王九年契丹為突厥所逼萬餘戶投高勾麗
補嬰陽王十八年襲百濟石頭城虜男女二千而歸
寶藏王四年唐太宗親征徙遼蓋巖三州戶口八中
國者七萬人

二十七年唐遣李勣等平高勾麗置安東都護府於
平壤以薛仁貴為都護分五部百七十六城六十九

萬餘戶補徙其民三萬八千三百戶於江淮之間

補北史云魏末人民多流入高句麗至是北濟文

宣帝天寶三年

陽原王八年

至營州遣使者崔柳于高

句麗請魏末流人以五千戶返

補漢書平帝元始二年

高句麗琉璃王二十一年

樂浪領二十

五縣戶合六萬二千八百二十二口合四十萬六

千七百四十八

補後漢書光武罷嶺東七縣悉封其渠帥為縣侯

順帝永初五年

高句麗太祖八十八年

樂浪領十八縣

除七縣故

為十

戶合六萬一千四百九十二口合二十五萬

七千五十

①補晉書云樂浪有分屬省併之異及夷貊所侵集
只領六縣三千七百戶

①補漢書玄菟領三縣戶合四萬五千六口合二十
二萬一千八百四十五

①補後漢書玄菟領六城戶合一千五百九十四口
合四萬三千一百六十三

①補百濟溫祚王三十七年國內春雨雹夏大旱漢水
東北部落亡入高句麗者千餘戶俱帶之間空無人
居

四十三年鴻鴈集王宮日者曰鴻鴈民之象將有遠
人來投者乎南沃沮仇頗解等二十餘家至斧壤納
歎置之漢山

補東城王二十一年大旱民饑相食羣臣請發倉賑
救不許漢山饑民亡入高勾麗者二千餘家重以大
疫戶口蕭然

補武寧王二十一年五月大水八月蝗民饑亡入新
羅者九百餘家

補武王二十八年侵新羅西鄙虜男女三百餘口而
去

補義慈王二年將軍允忠陷新羅大耶城獲一千餘人分居國西州縣

補二十年唐將蘓定方滅百濟以將士八十八人百姓一萬二千八百七人歸

補新羅聖德王十二年唐以大祚榮為勃海郡王地方五千里戶十餘萬

東史補遺曰新羅金盛時十七萬八千九百三十六戶高句麗金盛時二十一萬五百八戶百濟金盛時十五萬二千二百戶

補東史綱目新羅憲康王時京中坊一千三百六

十里五十五戶十七萬八千九百三十六高句麗
全盛時都城戶為二十一萬五百八戶及其亡國
內只六十九萬餘戶

⑩補新唐書百濟亡時戶七十六萬

高麗國制民年十六為丁始服國役六十為老而免
役州郡每歲計口籍民貢于戶部凡徵兵調役以戶
籍抄定又以人丁多寡分為九等定其賦役

太祖元年詔曰平壤古都荒廢已久蕃人遊獵於其
間宜徙民實之遂分黃鳳海白鹽諸州人戶居之

⑪補三年渤海為契丹所侵世子大光顯將軍申德等

率數萬戶來投高麗

補四年春黑水酋高子羅率一百七十人來投是夏又黑水阿於間率二百人來歸

補九年渤海將軍申德開國男朴漁等率衆來附者前後數萬戶

補十一年渤海人金神等六十戶來投

補十二年渤海正延等三百餘人來投

補十七年渤海世子大光顯率衆數萬來奔使處白州又渤海陳林等一百六十人來附

補二十一年渤海人朴昇以三千餘戶來投

補景宗四年渤海人數萬來投

成宗五年令收司檢點州府人戶多少以聞

補穆宗二年日本人道要彌刀等二十戶來投處之
利川郡

補十年東女真將軍阿豆間等三百四十戶來投勒
留嘉鐵等地

補顯宗七年五月契丹馬保良王保等十三戶來投
補六月契丹張烈公現申豆猷兒三忠等三十戶來
投

九年西女真木史木開等二百戶來投

補十九年東女真骨夫部落五百餘戶噲拔部落五百餘戶並來附

補二十一年契丹奚哥渤海民五百餘人來投處之江南州郡○西女真漫豆等二十七戶來附處之東畧

補德宗即位初制曰前女真將軍阿豆間等三百四十戶來投勒留嘉鐵二州之地然阿豆間本東蕃子頂史之族宜遣置東蕃

補契丹王守男等十九人來投處之南地

補元年西女真昆等八人來投○渤海沙志明童等

二十九人來投○渤海史通等十七人來投○渤海
弓音若已等十二人來投○渤海所乙史等十七人
來投○渤海高城等二十人來投○契丹羅丹等十
人來投

補二年契丹奚家古要等十一人來投處之江南○
渤海奇叱火等十一人來投處之南地

補靖宗五年日本民男女二十六人來投

補六年契丹東京民二十餘戶來投

文宗元年晉州牧使崔復圭招安逋民一萬三千餘
戶復其業王嘉獎之

補東女真蒙羅古村仰果只村等三十部落蕃長率衆內附○東女真蒙羅等村古無諸等三百十二戶來附

補九年契丹康慶遵等十五人來投歸我沒蕃人五十三口

補十八年契丹高奴等三人黑水包棄等八人來投二十七年西北面兵馬使奏西女真酋長漫豆弗等願附籍永為藩屏檢得戶三十五口二百五十二請載版圖從之

補東北面兵馬使奏三山大蘭支櫛等九村及所乙

浦村蕃長鹽漢小支櫛前里蕃長阿反伊大支櫛與
羅其郡烏安撫夷州骨阿伊蕃長所隱豆等一十二
百三十八戶來請附籍自大支櫛至小支櫛裹應浦
海邊長城凡七百里今諸蕃絡繹歸順不可遮設關
防宜令有司奏定州縣且賜朱記從之

補東路兵馬使奏東蕃大齊者古河舍等十二村蕃
長昆豆魁拔等一千九百七十戶請依霜昆例內附
又豆龍骨伊餘波漢等部落蕃長阿老漢等亦願為
州縣此輩所處遼遠在古未嘗朝覲今皆歸服若定
封疆設關防則餘波漢嶺東齊遮古太史伊補見昆

俊丹俊無乙比化豆等壤地無際蕃戶連居不可窮
塞設險請待嶺外諸蕃盡為州縣然後漸至遠蕃從
之

補三十二年女真高麻秀等十四人來投處之南界
州縣

補三十五年西女真漫豆等十七人挈家來投處之
山南縣以為編戶

補肅宗六年女真氈工古舍毛等六人來投賜田廬
以充編戶

補九年東女真一千七百人來投

補 睿宗二年東女真裒乙乃等三千二百三十人來附

補 十一年契丹三十三人漢兒五十二人奚家一百五十五人熟女真十五人渤海四十四人來投

補 十二年渤海五十二人奚家八十九人漢兒六人契丹十八人熟女真八人自遼來投

仁宗十三年判居京大小人負子弟謀避徭役各於本貫親戚戶籍類付以致名實混淆自今京人付外籍者痛禁

補 高宗六年哈真以婦女童男七百口及吾民為賊

虜掠者二百口歸于我趙冲以契丹俘虜分送各道
州縣擇閑曠之地俾之聚居量給土田業農為民俗
呼謂契丹場

元宗元年蒙古歸我逃虜民四百四十餘戶講和故
也

平章事李藏用從王朝元元丞相問高麗州郡戶
口幾何曰不知曰子為國相何為不知藏用指臆
櫪曰丞相以為凡幾箇丞相曰不知藏用曰小國
州郡戶口之數有司存雖宰相焉能盡知丞相默
然

忠烈王五年分遣計點使於諸道初都評議使司言
太祖奠五道州郡經野賦民皆有恒制近來兵饑相
仍倉儲懸罄橫歛重於常貢逋戶累其遺黎是宜計
戶口更賦稅以革姑息之弊由是累發計點使而未
見成效及東征之役發民為兵故復有是命

補鴨綠江內置伊里千刷諸道富戶居之

詳見
兵考

補七年林千戶押歸附一萬五千來

十八年教曰諸道之民自兵興以來流亡失業在元

至元

原本作至
正今釐改

己巳年計點民戶更定貢賦厥後賦

歛不均民受其病可更遣使量戶口之贏縮土田之

墾荒計定民賦以遂民生

補二十三年元遣使遼陽路推刷己未年以後被虜及流民歸之凡三百五十戶

補忠宣王即位初令五部點戶

補又分遣大臣括諸道民戶金台鉉為楊廣水吉道計點使規畫得意諸道報僉議司受指畫僉議司每回牒曰當依楊廣水吉道所為行之故諸道皆取法

忠肅王十二年教曰開城府五部及外方州縣以百姓為兩班以賤人為良人偽造戶口者據法斷罪

補恭愍王七年海陽人完者不火等一千八百人來投

八年遼瀋流民二千三百餘戶來投分處西北郡縣

官給資糧

補洪武二十年因市馬帝令就索之遂以三百餘口歸之

補十二年倭國歸我被虜人三十餘口

補十九年我太祖征東寧府吾魯帖木兒棄甲再拜

曰吾先本高麗人願為臣僕率三百餘戶來降是戰
凡得降戶萬餘歸者如市東至皇城北至東寧府西
至于海南至鴨綠為之一室○女真萬戶弓大以部
落一百戶請隸正陵

二十年教曰本國戶口之法近因播遷皆失其舊自
壬子年為始并依舊制良賤生口分棟成籍隨其式
年解納民部以備叅考

補女真千戶李豆蘭以一百戶來投

辛禡元年

原本係四年之下今釐改

改定都城五部戶數凡屋間

架二十以上為一戶間架小則或併四五家為戶

四年遣柳曼殊于東北面吳李南于金羅道安翊于
楊廣道南佐時于江陵道王安德于西海道慶補于
交州道計點戶口

補鄭夢周奉使日本還刷還俘尹明安遇世等數百

入夢周又憫倭賊奴我良家子弟力勸諸將各出私
貲以謀贖歸為書授尹明以遣賊魁見書辭慙惻還
俘百餘人自是每明之往必得俘歸

補五年李子庸還自日本九州節度使源了俊歸我
被虜民二百三十餘人

補八年楊水尺作亂西海道按廩使李茂獲三十餘
人以獻諸道按廩守令各獻所獲水尺斬其首謀者
餘皆釋之分置于諸州比平民差役不從令者斬之
補辛昌時趙浚等上疏曰水尺不人不事耕種坐食
民租相聚山谷詐稱倭賊其勢可畏願自今所居州

郡課其生口以成其籍使不得流移授以曠地使勤耕種與平民同其有違者所在官司繩之以法

又以大司憲疏曰近來戶籍法壞守令不知一州之戶口按廩不知一道之戶口每當徵發之際鄉吏欺蔽招納賄賂富壯免而貧弱行貧弱者不堪其苦而逃則富壯者亦代受其苦而逃矣其仕徵發者憤鄉吏之欺蔽痛加酷刑割耳劓鼻鄉吏亦不堪其苦而逃矣鄉吏百姓流亡散四州郡空虛者戶口不籍之過也願今當量田以所耕多寡定其戶上中下三等良賤生口分揀成籍守令貢于

按廩按廩貢于版圖凡徵兵調役有所憑依如有
違者輒繩以理

恭讓王二年都堂啓舊制兩班戶口必於三年一成
籍內戶主世系及同居子息兄弟姪壻之族亦至於
奴婢所傳宗派所生名歲奴妻婢夫之良賤一皆備
錄易於考閱近來戶籍法廢不唯兩班世系之難尋
或壓良為賤或以賤從良遂致訟獄盈庭案牘紛紜
願自今倣舊制施行其無戶籍者不許出告身立朝
且戶籍不付奴婢一皆屬公王納之然竟未能行

臣謹按東史補遺有三國戶摠而獨於麗朝

無所見

補龍飛御天歌我穆祖自完山避地移于三陟民之從徙者百七十餘家

本朝太祖元年下教曰戶布之設只為蠲免雜工前朝之季既納戶布又收雜工民瘼不少今後戶布一

皆蠲免

考至太宗庚寅始罷之見財用考

二年都評議使司奏言民無恒產者彼此相移戶口日減自今成籍之後如有流離者罪其家長許按者同律里正之不即告官者及守令之許接而不還本者移去而不推覈者各宜杖責上從之

太宗四年

原本作太
四年今釐改

議政府上各道戶口數

忠清道戶一萬九千五百六十一口四萬四千四百七十六金羅道戶一萬五千七百三口三萬九千一百五十一慶尚道戶四萬八千九百九十一口九萬八千九百十五豐海道戶一萬四千一百七十口二萬九千四百一江原道戶一萬五千八百七十九口二萬九千二百三十八東北面戶一萬一千三百十一口二萬八千六百九十三西北面戶二萬七千七百八十八口五萬二千八百七十二都計戶十五萬三千四百三

原本作十五萬三千四百四口

三十二萬二千七百四十六

原本作三十三萬二千七百八十六

六年戶曹上今歲諸道戶丁數

京畿左道戶一萬七百三十九丁一萬九千三百
十九右道戶九千九百九十丁一萬八千八百十
九忠清道戶一萬九千五百六十丁四萬四千四
百七十六慶尚道戶四萬八千九百九十三丁九
萬八千九百十五金羅道戶一萬五千七百十四
丁三萬九千一百六十七豐海道戶一萬四千一
百七十丁二萬九千四百四十一江原道戶一萬
五千八百七十九丁二萬九千二百二十四東北

面戶一萬一千三百十一丁二萬八千六百八十
三西北面戶三萬三千八百九十丁六萬二千三
百二十一都計戶十八萬二百四十六丁三十七

萬三百六十五

原本作三十七萬三百六十四

議政府奏定烟戶法

京中見任一二品為上戶三四品為中戶五六品
為下戶叅外為下下戶庶人及前啣各品以此為
差外方男女十五口以上為上戶十口以上為中
戶五口以上為下戶一二口不成戶者並三戶為
一戶

世宗十年漢城府上言丙午年版籍迄今始成京城
五部戶一萬六千九百二十一口十萬三千三百二
十八管領四十六城底十里戶一千六百一口六千
四十四管領十五其休養生聚可謂盛矣乞依周唐
之制五部各坊五家為比置長一人百家為里置正
一人城底各面三十家為里置勸農一人每一里皆
立標以辨夫家之衆寡貴賤老幼凡征役方施舍祭
祀婚姻喪紀農桑之勸懲每當施令家至戶喻以時
奉行使奔亡者無所匿遷徙者無所容相相守以
成禮俗命下吏曹與政府諸曹同議僉曰今之五家

長卽比長管領卽里正各坊管領四十六尙難擇定
若以一萬六千九百二十一户每百户置一里正加
一百二十三人何以充差且城底各里既有管領無
掌勸農不必更設宜仍其舊上從之

李晬光曰世傳開城府城內民户前朝時十三
萬而遷都後僅八千餘户今漢都平時户八萬
不及開都之盛而壬辰亂後死亡殆盡至今二
十許年未滿數萬户生聚之難如此

十六年設慶源寧北二鎮移本道民二千二百户以
實之

丙辰下教曰北邊新設四郡旣移龍城人戶以實之今將徙慶尚道一百四十戶忠清金羅道各一百二十戶江原道五十二戶而江原道觀察使啓道內凶歉待豐年徙之為便予意以為成大事者不計少弊若待豐年則必致緩弛且江原咸吉壤地相連移徙最易江原道其令依數徙之○辛酉金宗瑞等始盡復北疆置六鎮益徙南民以實之

補經國大典 每三年改戶籍藏於本曹漢城府本道本邑○京外以五戶為一統有統主外則每五統有里正每一面有勸農官京則每一坊有管領

○凡脫漏戶口隱蔽丁夫及民戶逃往隣境躲避差役等類以大明律斲罪發還原籍

臣謹按太宗朝壬午丙戌政府戶曹所錄上

者只舉諸道戶數世宗朝戊寅

恐作戊申

漢城府

所錄上者只舉京城戶數此固記載之有關

略者而京兆舊歲獨有宣祖朝丙午籍京五

部元戶都計為一萬二千九百六十五戶至

於外方則斲爛居半無以尋攷自仁祖朝以

後至今上朝諸式版籍不可遍紀只錄若干

年戶數如左

仁祖二十六年戊子式京外戶口

京畿戶二萬六千四十三口八萬一千二百四十	四忠清道戶六萬七千六百二十四口十七萬四	千五十二全羅道戶十二萬二千六百五十九口	四十三萬一千八百三十七慶尙道戶十一萬五	千一百二十五口四十二萬四千五百七十二黃	海道戶二萬四千六百八十七口五萬四千九百	二十七江原道戶一萬六百六十口五萬四千三	平安道戶三萬九千九百二十七口十三萬五千
---------------------	---------------------	---------------------	---------------------	---------------------	---------------------	---------------------	---------------------

八百十三咸鏡道戶二萬四千五百三十口六萬
九千三百四十八都計戶四十四萬一千三百二
十一口一百五十三萬一千三百六十五

補臣謹按京兆

掌故御覽獻民口數是年都計戶為五十三萬三千七百二十口為一百七十九萬三千七百一

補孝宗己丑備局啓曰以漢城府啓辭目今京外
人民之移來移去不定厥居者皆由於避役也若
不定制任他去來則將無以為國矣古語曰欲法
堯舜當法祖宗祖宗朝經國大典豈非今日之可
法乎臣等取考戶典則以五戶為一統統有里正
面有勸農官者其意深遠實合於今日依此舉行

則必多補益而久廢之餘今欲修舉則不可不嚴
立事目惕慮奉行應行節目亶議于廟堂舉行何
如從之

八年丁酉式京外戶口

京五部戶一萬五千七百六十口八萬五百七十
二京畿戶四萬二千五十口十三萬二千九百四
十七忠清道戶九萬七千五百五十二口二十八
萬六千五百九十一全羅道戶十五萬九千四百
九十六口五十二萬二千三十三慶尚道戶十九
萬四千二百九十八口七十六萬三千二百九十

二黃海道戶四萬五千二百二十口十三萬七千
九百三十九江原道戶一萬六千五百七十三口
七萬二千一百五十七平安道戶五萬五千六百
二十三口十八萬四千七百九十九咸鏡道戶三
萬二千一百九十九口十萬九千七百五十三都
計戶六十五萬八千七百七十一口二百二十九
萬八十三

補九年領議政鄭太和白上曰五家統之法講定已
久以歲歛尚未行矣上以問於吏曹判書宋時烈時
烈對曰五家之制三代遺法持商鞅以虐稔惡非法

不良也明道亦嘗言其可行矣上命自明年行之

補顯宗七年申明戶口帳籍法漏籍者全家徙邊
十年己酉式京外戶口

京五部戶二萬三千八百九十九口十九萬四千
三十京畿戶十二萬五千八百五十四萬六千二
百三十七忠清道戶十七萬八百十四口五十九
萬五千三十全羅道戶二十六萬三千二百六口
九十七萬三千三百七十一慶尚道戶三十六萬
四百九十七口一百十七萬三千九百四十一黃
海道戶九萬四千八百十五口三十六萬八百二

十九江原道戶四萬五千三百十五口十八萬五
千七百七十平安道戶十七萬七千九百十二口
七十二萬三百九十一咸鏡道戶五萬六千九百
三十七口二十六萬九千四十五都計戶一百三
十一萬三千四百五十三口五百一萬八千六百
四十四補臣謹按京兆掌故御覽獻民口數是年
都計戶為一百三十一萬三千六百五十
二口為五百一萬
八千七百四十四

補十一年領議政鄭太和遙啓以全羅監司申晷報
狀以為流丐之類多願即今所在之邑仍為入籍此
類若不入籍則無所統屬將為逋民而若為許籍之

後受食賑穀旋即逃去則莫重戶籍未免虛踈願奉
指揮云既不可一一督令各還其本土姑從情願許
令入籍於時在之官事似便當本道監司處以此回
移仍為行會於各道一體舉行事分付漢城府何如
從之

肅宗元年以京外人民洩散無統定以士夫庶人一
從家座次第作統

補備邊司五家統節目 凡民戶隨其隣聚不論
家口多寡財力貧富每五家為一統而以五家中
有地位年歲者為統首以掌統內之事○凡五家

必聚居作隣使之耕耘相助出入相守疾病相救
其或勢有不便者雖不得隔籬居生亦必鷄犬相
聞呼召相應無或如前獨戶籬居以為相保相資
之地○每五家作統而如或有餘戶未準五數則
不必越合他面以致混錯只以餘戶添統○每一
里自五統以上至十統者為小里自十一統以上
至二十統者為中里自二十一統至三十統者為
大里又差里正里有司二人如統首之制以掌一
里之事○有統有里以屬於本面面有都尹副尹
各一人所統多小各隨民戶之多寡殘盛而稱之

以某面第一里以至二三四五六亦隨其里之多寡○卽今郡邑中鄉品固難選擇而至所謂里正者則又每以庶孽賤類差之故人多謀避今後則里正及面尹必皆以有地位聞望於一鄉者雖文武蔭職者亦得差之以為管攝諸統之地如有謀避者論以徒配之律○每統將一統民戶列名或作為一牌或書諸一紙以為輪次照閱之地○其統牌式某邑某面茅幾里茅幾統其戶某役列書五戶統首某從其家坐次茅書之而賤人則降一行某戶某役之下各書率男子幾丁某差某職役某業

某技藝某無役某年幼婦女幾口門屋幾間或借
人生存物故有無○每季朔各統查正此牌具呈
於里任里任申報於守令每年終轉牒於道臣統
內里內如有來歷不明行止可疑不可容隱者不
拘季朔登時報知如有年歲加減牌內落漏役名
不以實者依戶籍事目論罪○統內之人男丁十
六歲以上者又必具身上戶口書某道某縣邑某
面某里某役某姓名年歲幾許書之一厚紙里正
里有司著衙官司印之每出入囊佩之無此者不
得入官門就訟庭以為身符其或見失者具由呈

官納紙一張自官改給之若元不持此者論以制
書有違之律○自今戶籍戶口中亦必以其里某
統第幾家書諸戶單以便考閱以防奸偽○流民
之類遷徙不常行止不適然既有男女家口亦不
可不隨衆作統而必令元居近統為其主統使得
常常照檢統牌亦令於元統牌端列書自某方移
來居住幾年男女幾口○凡姓名不載統牌者即
不在人民之數訟不得理死無殺罪○凡統里之
民相保相司婚喪相助患難相恤善相勸勉惡相
告戒息訟罷爭講信修睦務為良善之民如有不

孝不悌叛主殺人傷風敗俗盜賊不道等事必告
于里面聞于本縣以為隨罪犯輕重而懲治之地
○統內如有奸偽偷竊之類來歷不明之人亦令
登時發告自統里轉報於官守以為查治之地若
或漏報欺隱事終不發覺則統任重究統內連罪
若係本統已先報知而里中掩覆不告者并論以
制書有違之律○避役之民移來移去不定厥居
為即今大害既已立此統之後則凡民之移去他
邑者必須具呈因何事理指何地方自統報里自
里報官許其移去而後始去新移地方亦見其舊

居官許移文書然後始為容接無此者即係奸民
依法因推仍為區劃安插之地其不當容受而容
受者以兩界人物容隱之律罪之

四年戊午式京外戶口

京五部戶二萬二千七百四十口十六萬七千四
百六京畿戶十二萬五百二十八口五十五萬四
千一百三十二忠清道戶十八萬九千四百三十
九口七十一萬四千二百四全羅道戶二十五萬
六千一百五十八口一百萬四慶尚道戶三十六
萬九千一百七十五口一百萬五千三百二十八

黃海道戶十萬五千四百六十八口四十五萬五千八十江原道戶五萬六千三百三十三口二十七萬五千七百七平安道戶十五萬六千八百八十九口七十七萬六千六百七十五咸鏡道戶七萬一千九百二十八口三十七萬三千六百二十六都計戶一百三十四萬二千四百二十八口五百二十四萬六千九百七十二

補原本作五百二十四萬六千九百

數是年都計戶為一百三十三萬二千七百十七口為五百八十七萬二千七百十七

補七年申明女子入籍之法

補二十三年右議政崔錫鼎啓西北兩道戶籍停止

事定集而關西監司以為不可全停故以草案修正
明年四五月畢修云後式年不遠不如停止從之

四十三年丁酉式京外戶口

京五部戶二萬八千三百五十六口十八萬五千
八百七十二京畿戶十二萬六千六百六十八口
五十六萬六千一百二十忠清道戶二十一萬二
千一百六十五口八十四萬六千一百全羅道戶
二十八萬五千二十四口一百一十萬一千六百四
十一慶尚道戶四十七萬三千五百九十五口二
百十六萬五千七百三十六黃海道戶十一萬六

千四百四十九口四十一萬四百六十四江原道
戶六萬四千一百九十口二十七萬七千八百八
十一平安道戶十六萬七千七百四十九口七十
六萬三千三百四十咸鏡道戶八萬六千三百六
十五口五十二萬九千四百十四都計戶一百五
十六萬五百六十一口六百八十四萬六千五百
六十八補臣謹按京兆掌故御覽獻民口數是年
都計戶為一百五十六萬七百三十四口
為六百七十八萬
八千七百八十九

景宗四年癸卯式京外戶口

京五部戶二萬五千八百四十四口十四萬七千

七百七十二京畿戶十二萬七千八百七十三口
五十六萬三千一百八十五忠清道戶二十二萬
八百七十六口八十九萬五千三百七十六全羅
道戶二十九萬七百九十七口一百九萬七千八
百四十六慶尚道戶四十四萬九千一百三十四
口二百二十三萬三千五百四十三黃海道戶十
一萬九千二百五十三口四十一萬九千五百四
十四江原道戶七萬三千九百十四口二十八萬
一千三百七十四平安道戶十七萬四千三百七
十三口七十九萬一千九百十八咸鏡道戶九萬

二十二口四十三萬四千七百二十八都計戶一

百五十七萬四千六十六口六百八十六萬五千

二百八十六

補臣謹按京兆掌故御覽民口數是年都計戶為一百五十七萬五千

凡口六十六口為六百八十六萬五千四百四

補景宗三年趙泰者

時領議政

逡啓曰近來帳籍之淆雜

各邑同然而江都為尤甚蓋隣近通津喬桐等邑奸民謀避苦役冒濫投屬身居他官付本府帳籍每當分糶憑藉受食及至捧糶輒稱逃亡軍餉未收實由於此而不特此也許多虛戶作一奸罔簽丁出役之際其所弄奸不一其端今當新籍固宜痛加厘正一

從土斷俾不得容奸而第查實付籍不無戶口減前

之患不敢擅便敢此仰達矣崔錫恒時議政曰尹鐸在

晉陽損其戶數况冒屬虛戶圖受官糴種種弊端不可彈記則今雖查正實戶無減且本府民戶前則三千而今至七千戶雖減戶猶倍於前依守臣所達各別查減宜矣從之

英宗二年丙午式京外戶口

京五部戶三萬二千七百四十七口十八萬八千
五百九十七京畿戶十二萬七千三百六十八口
五十五萬九千五百九十八忠清道戶二十二萬

五千三百二十八口九十一萬一千二百二金羅
道戶二十八萬一千五百五十四口一百十萬五
千二百四十九慶尚道戶四十四萬一千二百七
十八口二百二十四萬三千二百五十二黃海道
戶十二萬七千三百七十五口四十六萬八千七
百十六江原道戶七萬三千十四口二十九萬二
百六十三平安道戶十七萬二千七百二十口七
十三萬四千九百四十四咸鏡道戶九萬五千二
百十四口五十三萬六百四都計戶一百五十七
萬六千五百九十八口七百三萬二千四百二十

五補臣謹按京兆掌故御覽獻民口數是年都計戶為一百六十一萬四千五百九十八口為六

百九十九萬五千四

補五年左議政李台佐遙啓外方人心日益巧詐戶籍之法近尤不嚴村民爭為合戶欲免烟役官吏任自虛戶欲免生事故統戶次第名實各異今年則適當式年各別嚴明戶籍之法必從家坐五家作統且統內如有來接者則問其原接官其身役明知其實然後許接而行止可疑來處不知者則不許移接面任朔末報知官家則庶無潛蹤隱接之弊此是舊制而中間廢弛全不遵行矣今宜另飭各道更為申明

此法李廷濟曰我國籍法最爲虛踈七事中所謂戶口增云者蓋謂守令行仁政於一邑境內之民不散他邑之民多聚云耳近來各邑惟事增戶或使分戶或錄虛戶今之戶籍大抵虛偽今考各邑戶籍則輒皆男口少而女口多寧有此理哉以此可知其避役欺隱之致也李森曰納粟加資之類戶籍中不書納粟二字只稱通政折衝以此之故朝士大夫常漠莫能卞之實爲可駭且不書納粟只書通政而不爲應役故以一洞言之數百戶之中出役者不過十餘戶一番釐正在所不已矣上曰納粟二字必爲書填事

各別申飭後不書者重究可也森又請不書納粟二字而混稱通政者用一名漏籍者全家徒邊律上以過重不許

補咸鏡南道慰諭安集御史李宗城逕啓今番水灾全家漂沒者甚多今年適當戶籍式年而家坐次茅無以審知初無著手成籍之勢曾前或值極無之歲則式年戶籍亦有退行之例云其中水灾甚慘邑姑停戶籍稍待其家戶之成樣退成戶籍似好矣都承旨趙顯命曰此則有掣肘之端初非舉一道一邑為之也其中處處漂沒之家獨不為戶籍似不可矣姑

仍項年所錄入籍而漂沒處則懸錄似為便好矣上
曰知申之言是矣今年戶籍如前式年為之而漂沒
處則必懸錄則可無戶口違錯之患矣以此分付可
也

①補備邊司五家統法申明舊制節目 統內如有
明白移去者必令先出移去狀於本官統首懸保
後方為成給○統內如有移來者統首考其移去
狀有無即與里有司同著名手本于官家有公文
者則許令安押無公文行止可疑者勿為許接自
官逢授於統首處問其元身役元居住登時移文

押送於所居官○本統內如有偽逃偽故者而統
首等欺隱不即現告逃故則雖是實狀本統內有
閑丁而里任欺隱不為望納則許令代定者摘發
告官偽逃故欺隱者統內主戶刑推定配閑良欺
隱者里任刑推定配摘發者終身免役

十年下教曰儒臣以宋臣包拯論戶口增減事有所
陳戒兩年存饑之餘豈無民戶之減縮者乎想来不
覺慙傷自予嗣服後十年內戶口增減之年京兆八
道並條列上聞我朝戶口最盛之年亦為考奏

補十一年知事宋寅明遜啓守令戶口增入於七事

中而每式年京兆以此責之守令既不能以德政勞
來之又不能搜得實戶往往增其虛戶徒為民弊辛
壬之後各邑戶口之大縮事勢之所必然而即今式
年戶籍京兆以辛壬之前比準責之下吏又從而操
縱各邑或不免作為虛戶充數或不無歛送情錢彌
縫之弊非但有違於重版籍之意前頭民間弊端必
將無窮京兆若又全無操坊則版政又將虛踈此固
可慮即自廟堂申飭京兆及諸道俾無比年操縱之
弊且示嚴懲漏戶之意為宜矣上曰此在守令而所
達是矣申飭可也

⑨補戶籍申飭事件 漏籍者乃是化外之民理當

不齒人類雖有毆打其身者勿罪與人爭訟則勿
問曲直置之落科事定式頒行出令後限一月聽
其自首特贖其罪限內未及自首而因他現發則
一坊依本律勘罪斷不饒貸目今節序已晚京外
帳籍已磨勘處則漏戶自首與現發者一一追成
丹未及磨勘處則這這從次茅入錄於本洞里○
京兆之必令比前式年磨勘蓋欲嚴防其漏戶之
弊而守令曾不致力查括多以虛戶充數厭然自
誇以七事中戶口之增固已可駭面里任等又利

其戶還之都食作名立戶奸弊多端莫重成籍虛
偽如此寧不寒心今後虛戶一戶以上以漏戶律
斷然行法○人物之生產多於死亡且三年始改
籍則其間戶數之增加理勢當然今式則三南畿
甸新經辛壬大殺合沒絕戶處其數亦多此四道
從前漏籍之習比他最甚避役容隱不可勝數若
能盡行搜括則似無比縮之患而道臣嚴覈守令
親執果無一丁之漏一戶之偽則設有盈縮不必
深咎使該府及諸道知委此意舉行○山峽流民
之朝東暮西者最難管束漏籍律之不得一坊施

行亦由於此此皆蝙蝠之類情狀本甚可惡堂堂
國法因么磨革闕而不行寧不絕痛此事專在守
令果能邑邑致察其移來移去必皆公文相準一
有隱者各里統首同被其罪則似不如前日散漫
無統外方列邑遵行之誠不誠係於方伯之檢攝
京師五部又係於京兆堂之撻察并加申飭著意
舉行慢不奉法者隨加論責

補十八年領議政金在魯遙啓曰咸鏡監司尹容狀
啓盛陳本道饑饉癘疫之狀宜除一坊擾民之政專
意撫摩之道而辛酉式年戶籍連因饑荒朝家許令

待今秋修上矣即今流亡甚多祇益騷擾之端且雖修正此後死亡又不知幾許曾前丙子年戶籍亦過三年至己卯而合行之今亦依此奉行上曰依為之

⑨補二十年持平任珣疏曰明帳籍以華民志臣聞版籍者有國之重務也版籍明也故三代有鄉遂比隣之制管仲行丘林伍保之政皆所以維繫民志奠安邦基也顧今日版籍之壞爽極矣或有戶而無籍者有焉亦復有良民詐為私賤者私賤冒為良民者箴名匿跡肆為奸欺流移逝去不少窮詰是故賦調不均奸究莫禁而軍政之闕額亦無

以填充矣為今之計但修舉祖宗定制而稍為鄉
遂五保之制損益之凡民之欲移徙者於其本道
之地及所到之處皆令隣比保明州縣簿錄以審
其去住而奸民之敢為隱漏者輒繩以極典若其
變幻冒稱者亦以次律治之明立科條嚴設禁防
然後如二十五家為一統則置統長一人四統為
一里則置里長一人三里為一鄉則置鄉長一人
以相連續仍畧倣呂氏之鄉約而簡其條目以時
講行一以為敦教礪俗之方則版籍既明而賦役
可均矣難之者曰擾而不寧為之奈何曰以一國

論之良民殆將三分之二而必欣然若更生其不
悅者重三分之一也為國之道當計其遠者大者
而行之宣循一時之浮議乎又曰我國之版籍不
明雖在無事之時猶有漏戶漏丁若徇行此法則
奸弊百出將無以禁遏矣曰此固然矣臣故以明
帳籍之說敢陳之於前帳籍既明則民數瞭然而
奸慝無所容何患乎戶布之不可行也

續大典

式年

子午卯酉年

成籍時入籍者戶口成給

入籍

而無戶口者以制書有違律論○戶口塗擦字畫改印文者以盜踏大部印信律論○大小推閔公事以錄戶口現納載

○

漏戶者漏丁者漏籍者增減年歲者

虛戶者冒錄者并成籍後限一月聽其自首免罪

補續大典 士大夫庶民一從家坐次序作統○每式年中外人戶別單啓下付史官

補二十五年左議政趙顯命所達戶籍圖之重事戶籍明然後民數可知肅廟實鑑載戶籍五家統節目極為詳備此乃其時名臣碩輔所講此法若行其為利益無窮而今則但有五家統之名實無依節目舉行之事誠為慨然此豈非先朝良法而明年又當式年一依先朝節目舉行之意不可不申明知委而此法之鮮弛已久臣等與之相議更為申明條目達下

後施行何如令曰依為之

二十九年癸酉式京外戶口

京五部戶三萬四千九百五十三口十七萬四千

二百三京畿戶十五萬七千二百三十六口六十

四萬二千十二忠清道戶二十三萬五千四百三

十二口九十三萬一千一百七十

補臣謹按京兆掌故御覽獻民

口數是年本道口為九十

三萬一千一百七十一 全羅道戶三十二萬六

千九百二十四口一百十九萬二千九百五十

補臣

謹按京兆掌故御覽獻民口數是年本

道口為一百十八萬二千五百七十八 慶尚道戶

三十九萬二千二百九十七口一百六十六萬二

千二百五十三黃海道戶十三萬九千五百八十
七口五十四萬三百四十九江原道戶九萬八百
十四口三十九萬六百四十平安道戶二十九萬
七千六十三口一百二十六萬七千七百九咸鏡
道戶九萬八千四百四十三口四十九萬七千四
百四十六都計戶一百七十七萬二千七百四十
九口七百二十九萬八千七百三十二

(補)臣謹按
京兆掌故

御覽獻民口數是年都計口為七
百二十八萬八千三百六十一

(補)三十五年領議政俞拓基遙啓近來紀綱解弛籍
法不嚴各邑守令或慮以減戶被罪惟以增戶為主

或令以獨子分戶或令以單奴各戶其弊特甚殘民之難保虛戶之日增多由於此不可不各別嚴禁自今年為始一從戶口實數成籍而內而京兆外而營門亦勿勒令增戶唯以實數計減雖使視前減縮而勿執頃之意分付何如上曰父子各戶單奴分戶如許守令何用哉嚴飭後廩問現發者科罪而先飭京兆可也

補四十年宗簿寺主簿呂榮祖所懷民戶之移來移去時必有公文自是古典蓋其有公文然後各邑軍領之盈縮虛實可無相蒙之弊故也自今以

後修明舊典雖流丐之民無公文則不許住接於
他境之意更加申飭似好矣上曰所奏誠是使備
局嚴飭

補傳曰今覽西關清北小科初試榜目四十人入格
中只祖率入籍者一人父率入籍者四人其中年老
者不是異事而年少者亦然分戶入籍即是禁令噫
父子各籍雖接屋連牆者於定省何而况坊里稍遠
者則為父者豈忍使各籍為子者抑何心各居其若
祖子孫俱存者其亦三籍乎噫堯舜之道孝悌而已
聞此不覺心酸噫彼道臣職在宣化宜體予意此似

由於貧窮難以同食之致而昔唐董邵南山樵水漁
能奉甘旨又唐張公藝九世同居南唐陳逋十世同
爨此等之類世所罕有其勢不獲已者外其令申飭
因此以思此非徒本道人之過諸道想必皆然其有
所由何則緣於江界府使陳章江界已有此弊此專
由於欲飾七事偽戶濫口之致一府猶然一道可知
推此一道諸道可知亦不無面任怯於官令勒令分
戶之致尤豈不大關風化乎其令道臣嚴飭清南北
果有此弊昔之百而今十即令矯正以示予樹風化
以礪世道之意若是下教之後繡衣廡問時若有現

投之事此非特面任之故即守令勒令增戶之致不治面任其不體教墜風化之守令當施制書有違之私律終身勿復擬字牧之任以此並與諸道兩都府而一體嚴飭此亦非守令之過每式年京兆以戶口不增退送之故以此觀之此弊京外布政導之也式年在前亦為申飭該府

補同知事趙明昂所啓今此樹風化之綸音實出於我聖上孝理之政而芽此事或不無因法生弊之慮蓋父子之分戶各居者多出於不獲已而形勢所拘遠近不齊或有分里分面而居者亦或有分邑分道

而居者朝家之申飭雖如此而決而一齊撤還之理
今若因各戶之禁為子孫者身在異地而修籍時勉
從朝令只入於其祖其父之率下而止則名曰合戶
而實無其效且戶口之贏縮實在於查括之善不善
其所增額未必專由於父子之分戶而綸音中有曰
昔雖百而今為十者并許其從實矯正不復使京兆
與道臣檢飭黜退臣恐此後成籍時面里任輩憑籍
隱匿益無忌憚其流之弊必至於實戶之大縮臣意
則先以一室奉養慎勿各屋之意洞加曉諭其接屋
連牆而居生者雖或各鼎而食勿令分戶之意別為

知委則公私似無所妨上曰予則舉大體而言之而意亦若此所奏誠是令備局以此一體嚴飭

補四十四年教曰周禮獻民數於王王拜受之顧不重歟今式年捧單加減其令以聞於是漢城府進戊子式年戶口之數京五部及八道戶一百六十七萬九千八百六十五口七百萬六千二百四十八大抵比孝宗八年丁酉版籍戶加一百二萬零口加四百八十萬零休養生聚於斯為盛云

續四十六年傳曰周禮獻民數於王王拜受其重可知八道猶然况漢城乎此後五部民數歲末令京兆

書入

續今上元年丁酉式京外戶口

續京五部三萬八千五百九十三口十九萬七千九百五十七京畿戶十四萬九千七百七十一口六十萬七千二百五十二忠清道戶二十二萬二千六百六十五口八十七萬八百十七金羅道戶三十一萬五千七十三口一百十八萬九千七百七十八慶尚道戶三十六萬二千一百三十一口一百五十六萬八千八百八十黃海道戶十三萬四千六百八十六口五十四萬九千四百七十六

江原道戶八萬三千七百四十九口三十四萬八
百十四平安道戶二十九萬六千四百三十三口
一百二十七萬四千四百五咸鏡道戶十一萬二千
二百七十口六十三萬九千一百四十八都計戶
一百七十一萬五千三百七十一口七百二十三
萬八千五百二十三

六年傳曰獻民數則拜受之所以重其事也我國
文獻實實雖以戶口一事言之幾戶幾口只有歲末
一張別單啓下之後作為休紙年前案錄纂次時亦
不得憑考事之疎漏莫甚於是兵燹以後見存文書

中各年民戶式年民戶數又作為冊子列錄一件入
啓一件藏于京史庫每於歲末本府郎官來詣政院
陪出該房承旨勾管出納如各司布泉案之例修正
入啓京史庫件自本府取來添錄以送事分付仍為
定式

續漢城府啓曰本府帳籍壬辰兵燹以前無一見
存自萬曆丙午以後始有餘存冊子而多不完秩
崇德己卯以後雍正壬子以前雖有見存文書只
錄京外戶口之都數而至於五部八道民戶之區
別則自雍正乙卯以後始為詳備故依此作冊而

崇德己卯以後式年民戶庚寅以後各年民戶作為二冊一件入啓一件藏京史庫之意敢啓

續又啓曰濟州三邑民數海道遲速未可預料京外已磨勘戶口先為入錄濟州三邑待其上來追後添錄從之

續判尹徐有隣請外邑人口數爰詳細列錄趁歲末修成冊送本府同為入啓從之

續十年丙午式京外戶口

續京五部戶四萬二千七百八十六口十九萬九千一百二十七京畿戶十五萬七千二百七十口

六十三萬七千四百八十二忠清道戶二十二萬
三百八十八口八十六萬四千八百八十七全羅
道戶三十一萬八千四百十七口一百二十二萬
一千二百七十七慶尙道戶三十六萬二千七百
九十九口一百五十八萬八千六百二十四黃海
道戶十三萬六千二百四十八口五十六萬四千
七百三十四江原道戶八萬四百八十七口三十
二萬五千七百四平安道戶二十九萬九千五百
二十三口一百二十八萬八千三百九十九咸鏡
道戶十一萬九千七百五十二口六十六萬六千

四百四十九都計戶一百七十三萬七千六百七十口七百三十五萬六千七百八十三

東國文獻備考卷之一百七十四

東國文獻備考卷之一百七十五

校正

戶口考二

號牌

高麗恭讓王三年都堂請籍水陸軍丁仍帶號牌

補臣謹按號牌之制肇自元氏槩括戶料民之要法也東國始初於恭讓三年蓋因元氏之舊而其制置法令史無明文不可得而詳也我朝亦嘗屢行屢罷至肅宗三年著為挈令未知與麗氏之制同異濶狹果何如耳

本朝太宗二年承樞府上言欲知國內人民之數甲
首助戶擇實差定乃急務也凡中外人民皆給牌錄
名而成籍不然則宜考其所耕多少而為之命三府
會議議論紛紜卒以考耕成籍為定未幾政府改請
人給號牌因成戶口上從之

四年命會三府大臣詢號牌可否先時已定給牌成
籍之法而朝論不一至是更議之河崙曰可行須當
為之

六年命議政府更議號牌法

知平州事權文毅上書曰人心有淳薄之變故立

法有經權之異皇明太祖法令紀綱既嚴且明軍民之衆皆給號牌是以民庶絕流亡之心戶口無增損之弊此因世變而救之之術也恭惟國家立經陳紀一遵華制纖悉備具獨於號牌未能及焉流亡相繼戶口日減願立鄉舍里長之法百戶置鄉長五十戶置舍長十戶置里長良民賤隸之額靡不周知依中國之制皆給號牌出入佩持如此則流移逃匿者無所容矣

十三年議政府定號牌法以聞上命行之其制長三寸七分廣一寸三分厚二分上圓下方

二品以上用象牙四品以上用鹿角五品以下用黃楊木七品以下用紫柞木庶人以下用雜木二品以上書某官三品以下書某官姓名居住庶人亦同但知面色髯有無軍官書某軍屬身長尺寸雜色人書某役人奴書某戶奴皆著火印惟顯官免著印

十六年命罷中外號牌

世宗八年教曰向者大臣請復立號牌法太宗亦已行之以民不願而罷之今若復行恐民之怨咨也卞李良曰為一邑之主則當知一邑之戶口為一國之

主則當知一國之戶口今民憚號牌者欲脫漏帳籍
避規賦役耳上然之

補世祖三年復行號牌法上謂申叔舟等曰戶籍不
明何以則盡知戶口之數對曰欲明戶籍當復行號
牌之法上令承政院具事目以啓乃下教曰標信皆
圓則號牌宜方且欲令百官先佩以示諸民自今大
小臣民皆佩號牌

五年申號牌法命李石亨捻之

補成宗己丑罷號牌法教政府曰號牌之法欲知良
賤人口之數行之十年死者亦多而無一還牌是必

轉相借帶因此奸偽滋而刑罰煩民甚病焉是宣立
法本意乎其令罷之

光海四年

原本作宣祖四
十三年今釐改

設號牌都監自大臣百官

下至庶賤皆佩失者收贖改出

○補左議政李恒福論號牌劄曰念昔先朝議者以

亂後民散欲行此法以為團束臣於是時奉使西
關入京倡言法之不便人或難之臣曰天大無外
而猶有所未包地博無際而猶有所未載深山不
能無狐狸大澤不能無蛇蚓聖世不能無逸民故
竭澤而漁非仁者之事料民而役非聖王之法昔

周公制法子生三日書名獻府長及六尺而征六十五而除為之軌里連鄉以處之為之長有司即良人以制之有徙焉則為旌節以行之無則唯國土納之制民之法若是其密也亦何嘗料民而枚數之若披絮而捕虱然者耶設令唐堯行此法則巢由為餘丁周武行此法則夷齊為餘丁此其有司者宜如何而處此民耶不得通於天下古今者非良法也唯至齊而管仲以三三之法行隱令寄政之術至秦孝公什什伍伍收司連坐告奸則賞匿奸則罰其政察察其民缺缺至元氏而號牌行

馬元氏始入中原悉以漢民分隸諸將至太祖十年始命忽觀虎括漢民戶分隸州縣至太宗元年分設三科中原以戶西域以丁蒙古以牛馬意者號牌之設必於此二時也時夷夏統合版圖淆亂故使佩號牌以相識認耳麗朝元季之傳來已失本意臣之前議以為不可行者此也及今十年之後得聞衆情顯顯咸欲一試臣乃翻然改圖曰與我獨見之陋熟如衆謀之臧人衆我寡敢沮衆議耶雖不敢贊成亦不敢沮撓

補咸鏡監司郭再祐疏曰朝廷方以號牌為急務

刻期通行如欲行號牌之法必先行宣惠之制然後民不逃而國有益矣祖宗朝臟污殺人軍律等法廢而不行故軍民不保其生不安其業而流離遷次豈其民情也哉救死不贍也如此而遽行號牌法峻則聚而為盜法弛則擾而增弊孰主張是是亦欺殿下也

補李廷龜號牌議曰通融作戶可除隣族之弊自前救民之政無過於此軍額必多減縮那移充定之際色吏操縱鄉井繹騷此實一軍籍也不可草草為之號牌曾有垂成之制按舊而行似不至大

段難事亦恐非時也兩件事俱是急務而俱有騷擾之憂既不可計其小弊又不可并舉兩事則無寧先行誦牌若善為規畫則闕戶自充民業有定通融之制雖不必別行而自寓於其中

補三年回諫院請罷誦牌備邊司回啓昔朱子在漳州問田役不均將正經界慮奸民猾吏煽起浮言而朝廷士大夫為其所動其後果有以失業之民羣起為盜上書而詆誣者今茲舉國之誦牌非止一州之經界其恐動誣斥何足隆哉頃有湖西兩班被其婢夫輩賊害則倡謂以誦牌監官而見

殺忠州客舍有目妓射失之事則倡謂以弮牌而
發造言恐賁無所不至至謂赴京先來到碧蹄為
騎賊所圍前日陽智竊貨之賊乃積年題名難捕
之賊而亦謂弮牌之故貼匿名書於都門倡訛言
於三江種種驚怪之說不一而足奸民之輕朝廷
至此甚矣而士大夫又從而和之則亦可傷也近
聞列邑所得餘丁隱戶或倍於平日應役之數以
此之徒順便處置依事目收布如步兵之為用則
其為國家利益豈不大哉唯在當事者不眩於浮
議而善處矣抑有一慮各官成冊幾盡捧完遽爾

停罷則許多民丁盡為貪官奸吏操縱侵虐之資
或勒為假官屬或嚇以定軍役富者納賂圖免貧
者受侵不支年年擾民必甚於設法之初亦宜遣
人於各道盡燒其成丹然後庶無此患矣若從容
善處於一齊佩持之後觀勢更議之為愈乎唯望
聖心堅定稍寬結末各道已捧成丹速令輸送於
弮牌廳俾及農前一齊佩持其間人情便不便更
令本廳十分商確為當

仁祖四年復行弮牌法先是自壬辰亂前每有此議
而異論紛興久未得行光海君壬子廟堂力贊其議

大臣李廷龜等亦以為言先頒牌式於士大夫令既布旋寢之至是延平府院君李貴上劄以為民散久矣軍額多耗宜復行號牌上始以為難屢請乃許之仍命設廳講行因民心搔擾翌年罷之

補號牌廳事目

牌品及製樣悉依今續大典所

載而生進以上并後面烙印品官及儒生大年號烙印印前書年歲居住印後書年續軍民大木牌書年住身長疤記大年號烙印宗室及文以紅填字武以青蔭以黃雜流以白僧徒南漢立役三朔受度牌後給牌盜牌者並斬告者免役同

年二月號牌廳行移各道未籍者限四月追錄旋
又限六月又復限九月自首秋又限以十二月畢
查牌案白徒充軍○翌年正月兵亂時臺臣金墉
陳啓罷號牌焚其成籍佩牌者罪之

補李晬光曰足兵之策在於號牌蓋號牌行則
時無倖民矣頃在壬子設廳成籍公卿以下佩
持數月而罷我國之習不能耐久如此惜哉

補趙翼疏曰號牌之法臣竊疑之此法之行本欲
充逃故之闕除隣族之侵其意豈不善哉然近以號
牌之故民間極擾惡讎盈路愚頑之民不呈簞

子移去者極多雖其呈單子者率多偽冒竊以為可慮也夫號牌本古所未有至皇朝始有之然只朝官佩之庶民則不佩也今之號牌與皇朝異所以括民數使不得漏而又使不得任意移徙也夫括出無遺則民皆定役無不役者矣不得移徙則定役者無逃避之路矣此號牌之利也然其括民無漏則可也使不得移徙則不可也夫民性莫不欲安居而苦羈旅使得安於田里生業有恒則必不捨而移居矣其去者必其生業已盡困苦不堪者也故王者之治只要保存其民使無所苦則自

不移去矣未聞設法而禁亡者也且失牌者有罪而奔走食力之民犯之必易是無路添出斯民一罪罰也關律場市皆有譏察是行路適市皆有拘禁遲滯而不得肆行也民情之必不便亦明矣蓋此法於括出民數洞盡無遺則誠為妙法今聞愚民不肯受牌流散者亦多有無根之人難保久居則土著不欲團束統內恐貽後患逐之使去毀家散業流離中野者甚多雖其不去而呈單子者為冒居多民不堪命逃喪其本業鄉里客戶殆半環一國皆然也今此法之行此輩或自欲避去或被

主戶之逐皆離其所居之地使其還於本土則亦善矣初為不堪本土之役至於流離今豈肯還舊居流聞徃徃聚居山谷此誠窮無所歸之民也既離編戶身負重罪乃是窮寇聚而為盜亦不難也

○補將行號牌李敬輿為御史分視湖南時有欲以號牌籍隨充軍額者敬輿曰號牌之法本為知民數而已民數既得簽兵補闕次第事也今若事緒未就先補軍額則民情必大駭竦朝廷大體豈如是耶議者無以難

○補安陰縣監洪鎬疏曰號牌之法為之有緒則足

為維民之良法始則條禁太嚴唯恐一夫見漏而遽又停罷譬如籠鳥見解穿罽蒙脫豈敢遲一息而飛走哉因致各邑軍簿皆作虛額防戍之時驅迫一族之一族勒填名而督行無一族者則侵責坊隣之坊隣徵價布而委送一縣如此一道一國可知

①補孝宗即位初吏曹判書金集奏曰日後如有言號牌可為者必毋輕施號牌者商鞅之法也為國者當先立紀綱何事乎號牌

肅宗元年頒行紙牌法是時申明統紀之法且因先

朝成命始用紙牌凡統內男丁十六歲以上皆令佩持而牌面書某縣邑某面某里某役某姓名年歲幾許公私賤則各書官主里正里有司著啣踏官印補二年選臣睦昌明陳紙牌之弊請姑停罷以待年豐上曰雖待後日民擾無異於今日不如仍為之若罷紙牌則後雖有良法不可行也

補領議政許積逵啓近聞紙牌甚不著實雖有佩者佩之於衣服之內故其佩與不佩自外看之無以知之於如號牌之為愈當待後式年並令以木代之而朝官則自今為先佩牙角牌出身及雜職之人則從

其自願而亦許佩之何如上曰有職者依此為之而出身及雜職不必從其願否並令佩之可也

補三年備局啓曰京外人民漫散無統朝徙暮遷不定厥居一番整頓在所不已故申明大典戶統之法京中則十家外方則五家作為一統以相管束且各出戶口佩之身邊以便考閱而紙書戶口非但磨破之可慮箴諸囊中不若佩之於外人皆目見之為愈遵列朝舊制代以牙木牌之意定案

補號牌事目 上自正一品宗室百官生進各軍門將官軍官下至三衛司計士寫字官錄事雜職

吏胥莫不佩持雖或無役之良賤自願受牌者則不待後式年為先佩持○時仕東班二品以上曾經二品東班實職人負時任三司曾經三司人負宗室二品以上並自官造牌烙印以給其餘大小人負使之造牌來呈烙印以給○受牌後或闕失或損破者公罪杖七十徵贖後造給新牌○受牌之人身死則所佩之牌納官燒火○牌面所踏烙印京則用漢城府小篆外則用各其邑號小篆○生進用黃楊木牌牌面只書姓名某年生某年生進○吏文學官及三衛司未料者計士寫字官畫

負錄事未經流品實職者內官生徒司謁司鑰典
樂加設新職影職人負並用小木方牌牌面書役
姓名某年生某年入屬○諸色軍兵既有腰牌不
必疊給號牌○凡疤記之類面上雖無可指之地
一身四肢之中無論大小痣痕可以為表者從實
書錄身長尺量則用東伍軍身長尺○牙角牌長
二寸廣七分宗室及文填紅武填青南填黃雜填
白前面書姓名某年生某年某科宗室及南某年
入仕後面書年條烙印加設職及三衛司以下雜
職則直書業名後面亦書年條小木方牌佩持人

以下烙印之下先書邑名次書年條○黃楊木方
牌長二寸廣一寸○木方牌長二寸五分廣一寸
五分

補四年兵曹判書金錫胄論號牌劄曰今年號牌
之法既命寢閣矣而復行之以木易紙則其事煩
而且便矣使無役者不佩則其應佩者亦不多矣
前年而朝士佩之今年而有役之民又佩之則其
為法亦且有漸矣此固所謂今日號牌有三善者
也雖然以紙則刻一板而千萬可印也以木則圓
方有體長厚有度一有不合輒使改易有非窮閭

下户人人之所可自治者也此民之所以便於紙而不便於木者也紙則藏於內而木則佩於外內有可隱而外無所蔽此民之所以便於紙而不便於木者也且造牌者皆務為過厚以其書面可削役名可改也而其他種種奸巧將與法俱生為法益密而長奸無已此亦非細慮也京城五部之內街巷市廛之間去官府無四五里之遠而至於遠方大邑則其民或在數百里之外舂糧而往治任而行一入官庭費日甚多考覈之際枷棒可畏刻烙之時需索難堪其間愁怨顛頓有不可盡言者

噫郡邑廢務以務行此牌疲氓廢穡以務受此牌
既佩之後又未見其有大便益則臣以為不如姑
依初命仍且未停止為愈也

補五年備局啓曰避役之民移來移去不定厥居實
是大弊故當初作統創行之時非不嚴明而非但民
不畏法守令亦不惕念舉行致令避役之類火耕之
民任意去來無異於紙牌未行之前事之寒心莫甚
於此御史陳達雖不知有此事目欲防此弊實有意
見一依當初事目嚴加申飭而如有如前任其遷移
之弊則該邑守令從重論罪之外監司亦難免不能

檢飭之責以此意更為行會於八道監司及開城府
江華府留守等處何如從之

補七年右議政李尚真遙啓紙牌以紙為之而其實
號牌也號牌固是義法而以其拘束之故致有民怨
既有丙寅丁卯之乍行旋罷則今不必更議而紙牌
則不宜革罷今若別為事目減定所任嚴禁侵擾則
有所益而無所害矣給牌之時先計各面應給之數
而官前印出成貼授面任分給則可無中間奸濫之
事至於戶口成給時亦如之而戶籍捧單時禁其捧
米之濫則法可行而弊可除矣此等節目似當並入

於戶籍中事目中矣領敦寧金萬基曰法之無於前者而創行之則民以為不便在所固然且紙牌初不設行則可也而今則行之已累歲若欲仍行不罷則更講節目去其煩苛使民不至於怨苦宜矣吏曹判書金錫胄曰法無全利又無全害今此紙牌之法雖未知其大有所益而至於知民數決獄訟不為無助矣領議政金壽恒曰凡法設之難而罷之易紙牌雖無大段利益業已行之姑為仍存無妨至於都副尹等任及節目間煩擾不便之端善為變通則可祛民怨矣李尚真曰有五家統紙牌然後戶籍亦得以

著實無此則戶籍一事必至解弛矣上曰民不可與
慮始而可與樂成此法之設本欲便民而未免有騷
擾之弊故曾有待今年更稟之教矣然紙牌之行不
無所助上年逆柵去處因其奴紙牌而知之溺死之
人亦以其所佩紙牌而辨識此亦可見其有益也且
各邑簽丁及決訟時多有所據節目中拘碍處則變
通而仍存勿罷可也

⑤補李敏叙劄曰號牌之法本為知民數備奸偽亦
是國政之大者也紙牌之行略成頭緒因其成籍
代紙以木不是難行之事而廟堂以期日之促迫

欲待他日臣意則有待於後事竟無成如以臨時
猝改為不便則令式年紙牌姑令待秋納官仍改
以木牌則民無再擾之弊而事可易就矣嚴立科
條一意整頓持久不變則無漏戶無倖民而曾前
百年之所想望者不勞而就緒

○補漢城府啓曰頃者號牌設行之時朝士及錄官
出身外皆以紙牌代木牌行之已過數式年矣當
初設為紙牌本為漸復號牌之意而紙牌與號牌
皆是避役者所不便故從前累議而累寢矣今此
紙牌之後無復括丁簽兵之舉民皆知朝家本意

不至作擾通行於八路已至屢年今若更加整頓
不至於廢墜則民數可悉古制可復實為便益而
但紙牌元非久行之制易致破壞闕失小民賤隸
或結於衣帶或藏於幫囊數月之後雖不闕失紙
畫漫滅殆不可卞字事甚苟簡今當式年改籍之
日紙牌見失者已至太半亦甚不便今式年改給
紙牌時以木牌角牌依古式卞等代給似合事宜
補十一年漢城府啓曰前日號牌事目啓下時偽造
號牌及圖出號牌之類定罪一款未及舉論不可不
定奪當用之律以為該曹舉行之地故取考律文則

懸帶關防牌面條有牌不帶者杖八十僭者與者杖一百偽造者斬詐為制書條若詐偽五軍都督府六府衙門文書套畫押字圖用印信者杖一百流三千里云偽造號牌者當用牌面偽造之律圖出號牌者當用印信之律而或以為偽造號牌之罪雖在因赦而遽以一罪論斷似涉過重云適輕適重之間臣等不敢擅便令廟堂稟處何如從之

補二十四年司諫鄭澐疏曰紙牌之弊當初此法之設不量時宜不恤民怨惟以設行為務故其時民間騷擾煩之之弊已不勝其狼藉矣每年式年

改易之際貪民困於紙價之供奸吏恣其貨賂之
徵間有守宰之貪饕者抄其失牌之類收米徵錢
靡有紀極逮于今春朝家慮其改易之弊設行號
牌之法姑以京中已試之弊言之區別良賤之際
益滋奸偽之端甚至私賤之隸名吏胥者以佩大
牌為甚羞恥造牌烙印之際厚賂當該之吏各造
大小兩牌一並烙印以為出入異佩之計及至牌
役已畢之後法府日出禁吏橫行市里解衣坐肆
者或以不佩見捉納牌腰間者或以隱牌被執多
錢者得釋乏財者見罰哀彼貪民朝夕之資盡歸

奸吏酒食之費至於外方之民則妄謂號牌設行之後當復籍軍定役之規遠近喧傳萬口沸騰生意以之蕭然惡聲以之徹天則民情之憾於此可見

補英宗二年叅贊官金祖澤遙啓號牌之法初非不嚴而紀綱解弛人不畏法佩牌者絕少此亦避役之一奸弊也自今為始申飭法令趁今式年使之一齊佩牌每年春秋自其洞內查出號牌有無無則報官治罪仍即造牌烙給則其中必有無役閑遊者仍充軍役則似無隱漏之弊迺避軍役者亦皆隨處現露

而自其現露處移文該邑果是逃亡則即為刷還否則仍充時居官軍役則渠雖逃亡到處未免身役亦可以防逃亡之弊矣上曰令廟堂申飭

續大典

男丁十六歲以上佩號牌

東西班及內官二品以上用牙

牌三品以下及三醫司登雜科者角牌生進黃楊木
牌流品雜職士庶人書吏鄉吏小木方牌公私賤假
吏大木方牌京則京兆外則各其官烙印以給不佩
者以制書有違律論借佩他人號牌者以漏籍律論
與者杖一百徒三年軍兵仍用腰牌

東國文獻備考卷之一百七十六

校正

戶口考 三

奴婢

箕子封于朝鮮都平壤為民設禁八條相盜者男沒
入為其家奴女為婢欲自贖者人五十萬

李璽曰箕子以三仁之聖立中國所無之法豈
無所以然哉蓋東方山形水勢迂曲而險阻人
心習尚剛褊而巧黠莫肯從令反覆難制非可
朝令而夕禁又不可草薶而懲惡奸盜賊賊之

類沒為其家奴婢使各統攝以興於變之化以致外戶不閉之盛自此以後至今數千餘年遵守不變禮讓之厚刑政之義非他外國之所可及也

新羅真興王二十三年王命異斯夫及斯多舍等計加耶國斯多舍先登功最王賞所虜三百口固辭王強之乃受於生為良人

補神武王遣使如唐遺淄青節度使奴婢帝矜其遠徙詔令還之

補唐書曰新羅息米穀于人償不滿傭者為奴婢

補高勾麗制有罪者便殺之沒入妻子為奴婢

補文獻通考高勾麗人公私債負聽許其子女為奴婢以償之

補百濟俗婦人犯姦沒入夫家為婢

高麗太祖元年詔曰泰封失道加以饑饉疾疫至使黎民賣身鬻子為人奴婢朕甚憫焉其令所在具錄以聞於是得一千餘口以內庫布帛贖還之

鄭麟趾麗史刑法志曰士族之家世傳而使
者曰私奴婢官衙州郡所使者曰公奴婢年代愈
遠漸至蕃盛於是設官而理之防禁甚嚴東國

之有奴婢大有補於風教所以嚴內外等貴賤
禮義之行靡不由焉

補二年下教禁京外豪富家劫占負債貧人仍為奴婢者

補麗制奴娶良女主知情杖一百女家徒一年奴自娶一年半詐補良人二年○公賤年滿六十放役○凡公私奴婢引誘逃亡放賣他人者一度歸鄉再度復常戶

光宗七年命有司按檢奴婢推辨是非奴多背主凌上之風大行人皆嗟惡王妃坊諫不納

補東史綱目曰昔箕子設禁相盜者沒入其家為奴婢東國奴婢法蓋始於此世族家世傳而使者曰私奴婢官衙州郡所使者曰公奴婢太祖初業之初將士本無奴婢者或從軍得俘或貨財買之太祖常欲放俘為良而慮動功臣之意許從便宜代遠漸蕃於是慮其爭奪之相尚無并之日滋設官以理之禁防甚嚴至是始令按驗

補安鼎福曰我東奴婢以世之法實王政之所不忍豈有一人賤籍百世而不免者乎古者奴隸皆其坐盜賊沒入誅捕四夷之為寇盜者為

之然蜀不及嗣惟其身而已曷嘗如我東之為
法哉說者謂奴婢法始於箕子並與世役之弊
而混稱之聖人仁民之政豈如是哉究厥弊源
三國之際貴戚大臣世執其權而新羅為尤甚
唐書新羅宰相不絕祿奴僮三千人貧窮無依
者或自賣為奴至于子孫仰哺役使又以攻戰
虜獲沒為奴婢無以贖放世役不已麗朝統合
時克敵討判多以虜獲給功臣為奴婢又屬于
各官衙於是私奴婢公奴婢之名盡一國之
民而幾皆入于賤籍法之不善莫過於此

成宗元年正匡崔承老上書曰我朝創業之初羣臣除本有奴婢者外或從軍得俘或貨買奴之聖祖嘗欲放俘為良而慮動功臣之意許從便宜逮至光宗按驗奴婢辨其是非賤隸得志陵轢尊貴競構虛偽謀陷本主者不可勝紀枉殺甚多失德大矣願深鑑前事於奴主之分執中處之

補五年詔凡隱占人逃奴婢者依律文一日綃三尺例日徵布三十尺給本主日數雖多毋過元直奴年十五以上六十以下直布百疋十五以下六十以上五十疋婢年十五以上五十以下百二十疋十五以

下五十以上六十疋

六年定奴婢還賤法蓋其贖良者年代漸遠則或輕侮本主故有是命

(補)穆宗十年御史臺奏慶州人融大詐稱新羅元聖王遠孫認良民五百餘口為奴婢賂宮人金氏及平章事韓蘭卿吏部侍郎金諾為援今已按問得實乞罪之王怒流蘭卿于楊州諾于海島金氏罰銅一百斤聞者賀之

顯宗四年判還賤奴婢更訴良者杖之釵面還主

(補)德宗四年判公私奴婢三度逃亡者釵面還主

宗文

三年復
申前禁

靖宗五年立賤者隨母之法

補柳馨遠曰賤者從母法始於此知母而不知
父禽獸之道也人類而處以禽獸豈法也哉然
原其法之所自則國俗之使賤人無異牛馬既
使之如此欲其從父則奸亂之訟不勝其煩故
不得已如是耳然則非從母之非也奴婢法之
非也至於後世則仍其從母而母若良女則又
必使從父為賤是法不為法而惟驅人入賤矣
非法之中又非法矣

(補)獻宗元年以逆臣李資義等妻子沒為兩界奴婢

(補)仁宗十年判無後人奴婢屬官

(補)明宗二十四年南路兵馬使收賊妻孥三百五十餘人黥配西海道充諸城奴婢

(補)神宗元年私奴萬積等六人樵于北山招集公私奴隸謀曰國家自庚癸以來朱紫多起於賤隸將相寧有種乎吾輩安能勞筋苦骨困於箠楚之下乃剪黃紙數千皆鈹丁字為識約以作亂殺崔忠獻仍各格殺其主焚其賤籍使三韓無賤人則公卿將相皆可得矣律學博士韓忠愈家奴順貞告變忠獻捕萬

積等百餘人投之江餘黨不可悉誅詔置不問賞順
貞銀八十兩免為良

高宗十八年蒙兵入侵忠州副使于宗柱領兩班別
抄判官庾洪翼領奴軍雜類及蒙兵至宗柱洪翼與
兩班等皆棄城走惟奴軍合力擊逐之宗柱等還州
以奴軍之匿銀器密謀殺之奴軍先覺之吹螺集其
徒先至首謀者家火之凡豪強之有素惡者搜殺無
遺境內婦人幼子皆被害王遣李子晟討平之

忠烈王四年禁公私奴婢放良

補五年收還諸臣受賜官奴婢屬都官

補六年嬖倖李英柱壓金州民大文為婢都官佐郎
李舜臣阿英柱意舞文為賤大文訴王府斷事官趙
仁規考其案具陳英柱姦偽王囚舜臣罷英柱職
補李連松遂安人本邑無奴婢連松以家奴婢屬
之其子支甚繁世世賴之

補文成公安裕納奴婢于太學

詳見學校考

補二十三年王朝元乞自己未以來被虜及流民在
遼瀋者悉令歸國元主許之遣使遼陽路刷三百五
十戶歸之

二十四年教曰近來壓良為賤者甚多其令有司劾

其無文契及詐偽者罪之

二十六年元征東省平章事濶里吉思欲革本國奴婢之法王上表略曰昔我始祖垂誡云凡此賤類其種有別慎勿使斯類從良若許從良後必通仕漸求要職謀亂國家若違此誡社稷危矣由是小邦之法於其八世戶籍不干賤類然後乃得筮仕吉思不敢復言

補時宰相莫有止之者中資金之淑曰世宗嘗遣帖帖兀來監國有趙石奇者訴良賤帖帖元欲用上國法世祖詔從本國舊俗此例具在不可變更

濶里吉思氣沮乃止

補忠宣王即位初教曰權勢之家奸猾之徒造作文契奪人奴婢田丁宜令官司追決無滯又曰外方民吏科歛煩重至有轉賣男女貨物納官者宜速公還其直付其父母

元年詔曰外方奴婢各有本役權勢之家冒受賜牌宜一切禁斷又曰四件奴婢四件曰寄上曰授屬曰賜與曰貿易若有歲閑不出者徵銀二斤以其奴婢准數充役

安軸嘗曰吾平生無可稱但四為士師凡民之被屈為奴者必理而良之

補王命讞部州郡奴婢及凡人相爭奴婢兩造不當不可歸一者悉送王所

補分遣刷券別監于諸道使刷還被奪奴婢

補忠肅王十二年元欲立省我國革世祿奴婢之法政丞崔有滄時以賀正在元詣中書省力言請因舊制從之及還國人舉手加額泣曰存我三韓者崔侍中也

補後五年命前王

即忠宣王

時免賤為良者還屬賤隸

補朴忠佐為金羅道按廉使有嬖人朴連傳內旨認良民為隸忠佐執不許連譖于王杖流海島

補忠惠王四年起新宮王謂近臣曰今宮闕將成欲以奴婢實之卿等各獻有姿色一兩婢尹桓康允忠孫守卿等不得已皆曰唯命蔡河中適至王顧謂桓曰卿等所議可語政丞桓愧不能言王連促之桓具以告河中面從曰王雖不教臣等議已有日敢不奉承退謂人曰君上請奴婢於臣庶未之前聞

補王用閔洩言求取四件奴婢甚急曰寄上曰投屬曰賜與曰貿易使洩及康允忠等主之諸豪富家婢有姿色者皆棄而納之北殿權準奉天佑權適家尤被其害唯賂洩者得免一日主吏至政丞

金石堅家索婢石堅驅逐即詣北殿王迎謂曰政丞得無以減獲事來耶時石堅子元之帖木兒仕元有寵石堅曰吾家唯有祖業奴婢臣已與之子王賜馬慰諭曰予將勿取政丞母怒

補置民田推刷都監以政堂文學鄭乙輔密直提學張沆為提調

補忠穆王四年驚城君辛裔母奪人奴婢其主乞還反毆之主詐整治都監遣吏捕其家人又毆之都監囚裔弟大護軍珣杖之

補恭愍王十年都僉議司啓年玄無以賑活良人不能自食者令富人食而役止其身有奴婢而不能養令食之永為奴婢王惡其認民為隸焚其書

補李仁任田園奴婢遍中外將相爭相効之奪人田民時人目之曰提調奴婢

補辛禡元年教曰抑良為賤感傷和氣自王旨後限一日悉皆放免違者痛理

補七年置田民辨偽都監

補辛昌時憲司上疏曰一都官所屬奴婢官司倉庫奴婢及近日誅流貧將祖業奴婢新得奴婢令

辨正都監亦計口成籍毋使遺漏每有土木營繕之役賓客佛神之供皆以役之其於坊里雜役一皆除去以安其生以衛王室

恭讓王三年卽舍上䟽曰奴婢雖賤亦天民也例論財物恬然買賣或以牛馬易之一匹之馬給二三口猶未足償則以牛馬為重於人命也昔廐焚孔子曰傷人乎不問馬則聖人之貴人賤畜如此安有以人易馬之理乎請禁其買賣從之

四年設人物推辨都監定奴婢決訟法並禁其良賤相婚及冒稱收養者

先是辛毗為田民推整都監外假公議實欲市恩
於人凡賤隸詐良者一皆良之於是奴婢之背主
者蜂起曰聖人出矣毗欲得羣小之心以濟奸慝
類皆如此

本朝太祖元年教曰前朝之季土田奴婢法極為紊
亂詐謀百端遂至骨肉相夷毀傷風俗予甚憫焉自
戊辰回軍以來既革私田民心以定獨奴婢一事尚
循舊弊自洪武二十五年已前凡奴婢訴良者役使
已久則仍令從賤曾不役使而勒令為賤者許良如
有違令者罪之文卷沒官燒毀令有司布告中外

知刑曹事張演等上言向者下旨有訴良者役久仍賤之法然有役久而未得決者亦有得決而未得使者爭訟尤繁矣上曰予欲禁爭訟反以為言何也令憲司尤聞

四年立奴婢辨定都監以左僕射南在簽書韓尚敬中樞金希善為判事

定宗元年罷辨定都監其未決及誤決者悉送刑曹都官

太宗六年定屬公奴婢陳告之法

政府疏曰良賤未辨者及婢妾所生皆許免賤屬

司宰監頑惡之徒不體上德猶以為不足迹隱避役者頗多有之將有冒名混雜兩班之弊乞限來十月初一日前不現身者許在前相訟者及本主族親陳告並令從賤一半給告者一半屬公又相訟兩邊不當者屬公以為恒式上從之

補七年賜奴婢三百口于成均館

詳見學
校考

補十年召掌令郭德淵教曰人家減獲有投屬本宮者予聞其主欲言而不敢爾等其明辨之投屬者悉加禁斷

補十四年復設奴婢辨正都監

補尹準行狀曰甲午國家以公私奴婢爭訟雜
畱積年不決人多寃滯為設辨正都監分房釐
之尹唯為第十房聽理明允案無畱牘人無隱
情時有兄弟相訟其兄不勝詐憲府諭曰尹公
素行正直見事明審必無枉其兄指天誓曰枉
則尹死無枉則我當死俄而出未及門而暴死
十七年立奴婢大限法

金時讓曰我國應軍役者才十五萬而私賤多
至四十餘萬聞麗朝無良妻並產之法故一時
權臣富傾一國而奴婢不過數十人以故麗朝

兵多云不敢保其必然後考國乘良妻並產之法始於永樂八年未知何人所建白也夫賤女不定其夫故生產者難從父役從母而役者乃良法也賤人既從母役私賤之並產者何得又從父役宜其私賤多而削為無兵之國也

臣謹按金時讓以為良妻並產之法初行於永樂八年是歲即太宗九年己丑也其時定制顛末無以尋攷時讓所見國乘亦未知為何書也

世宗元年革中外寺社奴婢歸于宮

二十年河緯地對策曰天之生民雖無良賤之辨
上之使下必有尊卑之等蓋大夫不可以徒行婦
人不可以外遊身為朝列而使妻子襲柴水之勞
何以成禮俗乎故周禮凡有罪者沒為奴婢使執
賤役惟我東方自箕子以來禮義之美聞於天下
非特用夏變夷之俗亦由別良賤立奴隸以定上
下之分而使大夫之家皆有尊卑之分也家主奴
婢之制一定而主之視奴猶君之視臣奴之事主
猶臣之事君然則奴婢雖亦天之民固不可變賤
為良與主抗衡也

補二十六年濫殺奴婢者當房人口屬公受教

詳見刑考

補時黃守身以上護軍掌決都官奴婢之訟牒訴雲委守身始入官謂僚佐曰天下豈有難斷之事取舊案牘一覽盡得情偽處決風生庭無留訟

補世祖四年設推劄都監

補十二年設掌隸院自高麗初置都監掌奴婢簿籍決訟本朝太祖元年因麗制置刑曹都監至是始置一司名掌隸院專主奴婢之政

補凡冒認和誘略賣良人及他人奴婢者以大明律斲罪

經國大典 公賤每三年成績案每二十年成正案
歲於刑曹議政府掌隸院司贍寺本道本邑

補經國大典 二品以上有子女公私賤妾許以自
己婢告掌隸院贖身凡贖身用年歲相准奴婢若逃
亡者本身生存則充立不得充立者還賤○宗親總
麻以上外姓小功以上親及親功臣賤妾子女並從
良無贖身立役 大小人負文武官生負進士錄事
有蔭子孫娶公私婢為妻妾者之子女其父告掌隸
院覈實錄案移文兵曹屬補充隊年滿十六不告者
告狀後過三年不受立案者付案後不立役者許人

陳告還賤○公賤有流亡者本官即執上司移文諸道跟尋發還京奴婢逃居外方者論罪捉還○正案付奴婢詐良或相訟者及案內父母或祖父母或已身名字明白現付外援引投托者並勿聽理○內需寺奴婢掌隸院檢舉成正續案本院本曹本司本道本邑各藏一件○京外立役奴婢免貢給奉足二口諸邑奴婢無奉足京則分二番相遞立役外則分七番相遞選上○奴婢年十五以下六十以上者篤疾者所生三口以上貢役者免貢役所生五口以上貢役及年七十以上而所生三口以上貢役者免一口

八十以上又給侍丁一口九十以上全給侍下○京
奴年滿五十除樂籍免貢役奉足侍丁免貢役奴婢
每三年推刷改給立案○功臣丘史及丘史之奉足
以外居奴婢給身役三年後仍本役妻存仍給○陳
告逃漏奴婢者每四口賞給一口三口以下則追徵
各年貢布及楮貨給賞容隱役使者論罪後徵役價
每一口一日楮貨六張倍本價而止逃亡或身死者
徵役價後以其奴婢徵償○凡賤人所係從母役唯
賤人娶良女所生從父役僧人所生雖良亦從賤○
私賤未分奴婢勿論子女存沒分給未滿分數者均

給嫡子女若有餘數先給承重子又有餘則以長幼
次序給之嫡無子女則良妾子女無良妾子女則賤
妾子女同凡父母奴婢承重子加五分之一衆女子
平分良賤妾子女七分之一○父母祖父母外祖父
母妻父母夫妻妾及同生和會分執外用官署文記
須具證筆同生以上文記手書者不必具子之於親
亦不須官署○傳得奴婢者期年內告官受立案若
財主成文契而死者召侍病族親或奴婢閱實給立
案○凡買賣奴婢告官私和買賣者其奴婢及價物
並沒官年十六以上五十以下價楮貨四千張十五

以上五十一以上者三千張若盜賣則價物徵於盜
賣者○放役奴婢後所生許子孫役使○凡奴婢因
事功為良者以公賤充給○相訟奴婢三度得伸勿
更聽理○奴婢決訟定限洪武壬申年以前逃亡私
賤內時使用奴婢中同腹三四寸現存者及雖無同
腹三四寸當身現存役使明白者許令推考至正辛
丑年以前逃亡者並勿推○永樂丙戌正月初一日
以後私奴娶良妻所生雖已屬公置簿若不付正續
案則從父決給○衆所共知收養侍養及同姓異姓
四寸外贈給奴婢亦勿受理○每三年女妓一百五

十人蓮花臺十人女醫七十人並以諸邑婢年少者
選上

成宗十五年設推刷都監推刷市外奴婢總二十六
萬一千九百八十四口諸邑驛奴婢總九萬五百八
十一口

臣謹按中宗朝甲戌設都監明宗朝庚戌設
都監而旋因歲歉停止丙辰又設都監而只
知其為推刷而設也至於定貢之制括額之
數無得以詳焉

補燕山時定奴告主反坐法

補中宗九年設推刷都監

補明宗十一年又設推刷都監

補宣祖七年李珣疏言公賤選上之苦曰選上本意非欲辨出綿布也在京典僕不足於立役故以在外公賤輪立京役名之曰選上貧殘公賤裹糧羈留侵苦多端有所不堪始以綿布償役今則只徵綿布而已無一人來役者矣民生日困戶口日耗公賤亦民也豈能獨完輾轉流亡不能生息而一償選上之役則其免敗家者鮮矣二年納貢一年選上大率三年必一敗家而公賤之苦極矣加

之以該曹色吏分定不均雖奴婢衆多之邑有賂則少定雖僅存數口之邑無賂則多定力不能支則侵及一族齊民亦被其苦矣既困之後雖公明均定亦不能救矣若不變通後患無窮臣愚以為改身役受綿布已非大典之法則今不可廢選上而加身貢也願命該官詳考奴婢之案據其現存之數每年奴貢納綿布二疋婢貢納一疋半都計幾何以其五分之二儲于司贍為國用以其五分之三給各司以淮選上之役綿布不足則量宜減立役之數夫如是則公賤有定貢可以預備無猝

辨之患收貢有定簿無所剛改絕姦吏之術歸令
不煩而民受實惠矣

補李珥所著東湖問答曰從母之法不用於良
女而良民盡化為私賤由今之道無變今之政
雖克舜在上亦將無以為治矣

補承旨李珥遙白國家於私賤立法獨偏既從母又
從父其弊至於良民盡入私家而軍丁日少羣臣因
贊其變通之便諸臣皆守從母之義金宇顥獨曰從
父是義理所當然豈可從母違背人理乎名不正則
言不順力爭諸人皆以為迂闊事寢

補李晬光曰我東方素重名分奴婢之法始於新羅而壬辰亂後或以軍功或以納粟輒許免賤冒偽滋多以至登科頂玉者比比故蔑視士族凌侮其主至有叛弑之變日後之憂恐有不可言者

補劉克良母相臣洪暹之婢也克良登武科厯官榮顯卿宰爭以將才薦一日母謂克良曰我本某家婢也少時誤碎玉盃恐被罪而逃遇汝父生汝克良聞之大驚即上京尋主家陳情欲上疏削科還為奴洪暹曰爾非我奴也何為出此言克良曰

母旣言之何敢冒法背主欺君乎遲義之為放役
文券給之克良謝而去每以主稱之後宰邑帥閭
見謁之時自里門步進所獻之物手自持納嘗為
衛將分軍洪遲入直禁中有所言以小紙書數字
招之克良卽欲起去兵曹摠府官曰分軍國之大
事子何徑去克良曰舊主見招不敢遲迨一座驚
歎

二十六年命於諸路擇私賤之精壯者並充東伍
柳祖詡疏論私賤為軍之失相臣柳成龍覆啓曰
以天下公共之理言之則私賤獨非國民乎我國

私賤日滋月盛而良民役重漸就耗散私門則家
家有公侯之奉而公室則無民故先賢亦欲行限
田限奴婢法其慮遠矣今收拾數千百之卒以為
訓練禦敵之計乃有無識之輩愛惜數三臧獲欲
則國家之大計者其賢否何如也上嘉納之

柳成龍曰壬辰倭亂時車駕出城亂民先焚掌
隸院刑曹蓋以二局公私奴婢文籍所在也又
於甲午上宣廟劄曰壬辰亂前各司奴婢元數
三萬七千餘名其後以公賤役歇漸次增添其
數不止於此云

李恒福曰天賦之均先區貴賤素有定分不係
賢愚固非生物之本心君子小人相為治養各
成一家規模更千百年性習民安又成一國之
聲教今欲變更必須先變國俗使士夫子女皆
親扶戴炊爨如中朝之為次振紀綱使中外人
心初聞令下一齊趨行無敢後先然後乃始大
加宰割不然而徒欲一朝易俗而治則情拂而
法逆民窮而姦生恐不可為也

補三十年招封使李廷樞疏曰臣聞一國有流來
之俗一家亦有上下之分天命雖革而國俗不可

變也名分不可亂也我國私賤世傳之法久而成俗雖以王太祖之神威元世祖之武力不能抑而改之世家私賤之分猶國之有君臣名分苟亂國隨而亡故免賤之法祖宗重之變生以來納粟納馬納鐵者皆免為良臣恐非常之變匪朝即夕國非其國也

補光海初都體察使李恒福啓曰我國私賤高曾相傳名分已嚴情義已熟此法一亂人情不便事難施行今因不幸而幸得屬公人口數千之多若因此時申勅該官詳查京外奴數名著一籍一面

另差詳明才局之官委往北道會同監司刷出私
賤容令本主投牒自言給帖搜給永定正軍以及
子孫京奴一人直當北奴數口以是叅量別為事
目以二千之奴足成三四千之兵為益不少姑以
某邑以北為限先令搜定此猶不足則又有一計
經亂以後各司奴婢漏籍者過半各官補為額外
奴婢別成一籍私自徵貢為官中之用極是無理
一面一一刷出以繼不足之數著實行之不過數
年北路將盡為兵其與南方弱卒不習水土而千
里赴遠戍者互相萬也

補近例內需寺奴婢皆冒法復戶安山郡守李貴獨執不許內奴就詐內需寺持小印文書稱內旨令依前給復貴曰苟有上命當自政院出小印內旨外臣何敢發視遂拒而不納

補仁祖二年備局啓曰各道各官奴婢壬辰以後死亡流散餘存無幾其後又以功臣賜給稍實者盡為抽出以此各邑不成模樣或有未滿數口之處邑中使喚及京邸奴婢之役皆責於齊民邇來百姓之困極雖由於徭役之煩重而替受官役之弊十居二三今此功臣賜給永給及丘史專以各

司奴婢及緣坐罪人沒官奴婢從自望定給而官屬則一坊勿許為當且先朝以人物蕩殘之故永給及丘史皆減折磨鍊而該司所定丘史之奉足亦不定給後來濫觴多數冒占侵擾各邑無所不至請一依先朝例施行從之

補八年副提學趙翼劄曰我國士民之有奴婢實財產之大者其賴以為生業與土田無異所貴於治者使人各保其產業無相侵奪此乃所謂絜矩之道也若不為辨理任其投屬容其占奪則奪之者為貪冒不義被奪者為失業飢寒此大亂之道

也況以上司衙門為逋逃之淵藪可乎又況內需
司乃人主之私儲若有容受投屬之事則其何以
禁諸司之投屬亦何以禁庶民之相奪乎蓋內奴
之役在於諸役最為輕歇故非但私奴之叛主者
歸焉良民之避役者亦多歸之特私賤有本主補
完而良民之投入者無由知之耳此固出於良賤
投入者姦猾之計內奴及本寺招納之罪而民心
之怨咎則皆歸於國家此豈非大可痛心者乎

○補又曰我國之法良賤交嫁生子者皆為賤人
父良母賤既從母而為賤父賤母良不得從母

而為良亦為賤人是何厚於賤人而薄於良人
也不知此法始於何時而必其時宰相朝士不
念天地大公之道而只利其奴婢之蓄也而為
之也此其不公之甚者也夫賤人之所生不論
母之良賤皆為賤人良人之所生唯母亦良人
乃得為良是賤人得吞並良人而良人則被吞
於賤人以此賤人日滋良人日減若不變此法
更至數十年則國中皆為賤人而良人絕無而
僅有也

補孝宗三年判決事南銑逖啓勲臣賜牌奴婢圖出

之事實由於以官奴婢移屬各司奴婢之故也官奴婢有病者則多屬與各司奴婢相摠雖是洪典而奸偽之弊每從此出若果病廢者則雖移屬各司必無依他收貢之理此路仍存則今雖禁斷他日必未免如前之弊移屬之法一切革罷何如上曰此意甚好嚴明行會于各道

補四年領府事李敬輿劄曰臣意以為公私良賤並從母役而但世傳臧獲一朝見奪則國半之惡未易止息限以明年或後年漸然行之其後所生皆使從母則不出十餘年良民日滋矣

補六年設推刷都監時各寺奴婢不行推刷已久逃故虛實了不可辨徒掛空簿漏逸甚衆至是始設都監以刷之又遣御史以覈之良者雖偽而歲久則蕩滌之寃者陳訴則審察而伸雪之一戶多丁則量減之

補七年判府事金堉疏曰推刷之法令都監申明分釋已為免賤良役三代者雖無公文皆許聽理則奴亦民也民亦奴也推刷之惡除矣

補命金應河庶子特免刷還

詳見禮考

補魚川察訪金澄應旨疏曰內奴身貢比他倍重

至於關西則以白紬收捧之邑頗多一匹之價幾至白金五六兩之多故貪殘奴婢無路辨出號呼怨咨有不忍見雖剥膚搥髓難以盡捧而流散逋逃之弊亦不可防變通之策其可緩乎

補八年忠清監司李慶億啓舊例公私奴婢父良母賤從母母良父賤從父用是賤隸日蕃而良民日縮請自今男從父役女從母役從之遂為定制

補金堉上劄曰都監決訟全以良籍為驗亂離之餘文案散失若執此一槩以忤公私則今之有藏獲者誰能免此且壬丁軍功亦以不經掌隸院文

署為拘軍功許贖各任一時便宜撙攘之中事皆如此若拘以小文不終大惠則先朝報功之意恐非但已至於代贖之類限前物故情有可惡而但此輩若非士夫支派或是有蔭子孫為良既久遽使還籍亦涉可矜若令有司無諉於良籍而但核虛實無拘於小文而只辨真偽寧恕其前罪而許令代口則似無大損於國家而亦可稍慰於民怨矣

補憲府劄曰今此推刷之法蓋以修明舊法整頓漏籍豈曰少補而但督責既嚴奉行無漸蒼頭之

籍幾半國中而追究尋問舉國擾攘今已三年臣
等伏見當初備忘記自都監自其祖登科生進者
特用廣湯之典仍許為良自其祖父冒良而其身
始為出身生進者並許代贖至寧失國家公賤而
不忍使吾民有流離愁歎之苦等語大哉王言德
意已布而其身之始為出身者至今未贖又按大
典刑典條文武官生進有蔭子孫又嫡無後妾子
孫承重者娶公私婢為妻妾子之子女其父告掌
隸院覈實錄案移文兵曹屬補充隊此皆本朝待
士之厚繼絕之義當為萬世法程謹守勿失者也

補時有一訟官妄度內旨凡訟涉內司者一屈輒
繩以壓公之律編配狼籍李厚源奏曰凡訟必經
三度然後罪其曲者今若一屈而遽蔽其罪則非
國法也昔盧思慎為相時推還他人所占臧獲其
人來訴無他手指即焚其券而歸之至今傳為美
談堂堂國家豈為一二奴婢乃可招民怨乎

補柳馨遠曰奴婢之名本起於以罪沒入無罪
而使為奴婢古無其法也夫以罪沒入者亦不
罰及後嗣况無其罪者乎中國古法雖以罪沒
為奴者有一免再免之限至三免則為良人雖

有終身為奴者亦無及於其子之法本國奴婢之法不問有罪無罪唯按其世系而百代為之奴是以或無知賤夫而制人死命設令賢才出於其間而亦錮為人奴此豈理也哉

補又曰官府僕隸之任既有定祿不待奴婢而不患無充立之人矣今各司各官皆役以奴婢不給料故積至數百年奴婢宜不可勝計而逃散無定或數多之處則額外有餘而為官者私自放役收布不足處則一人至無七八人之役而尤不勝其苦若令酌事定人有祿代耕則豈

有此弊哉

補顯宗八年副校理李端夏疏曰大典徭賦條曰外居奴婢收貢納司膳寺註曰奴綿布一疋楮貨二十張婢綿布一疋楮貨十張其貢至歇祖宗朝輕徭薄賦以厚民生之意大可見也今之所捧則不然奴貢二疋婢貢一疋半而楮貨價則又磨鍊於此外且此等綿布古以三十五尺為準而今則以四十四五尺為準如其頭目京外色吏人情及糧資紙束等物一併計之則一年一人之納幾於一牛之價一家或有累名備納者勢沒奈何至於

流散各官分徵於近一族近一族亦逃則又不得已無論遠近虛實一人之族籍成數十人年年收合舉一國之人而不被其弊者蓋無幾矣

補九年又上疏曰各司奴婢以式年推刷而奴婢等遠近娶會供接官負勞費不少願依內需司例十年一推刷云雖不能一從其願兩式年一推刷則亦無所失而少歇其力

補判決事南九萬考見院規大君王子公翁主成長後定式賜牌奴婢多不過十餘口其或逃故更無代給之規而宣廟於永昌新生時特賜三百口更補給

其逃故之闕其後仍用此例而於公翁主亦給逃故之代一宮家三百口蔓延至數千口各司奴婢無以充數於是作為啓目請盡復古規而勿補逃故後以承旨更力請蒙允未幾復還叔

補十年以嶺南飢荒命查各司奴婢乙巳後指徵無處者蠲其貢

補判府事宋時烈嘗告于上曰良女所生從父而屬之私賤良丁所生亦從母而屬之私賤此實私邪偏曲之甚者也先正臣李珣嘗極以為言而力請變通而未能者故臣試嘗冒請而幸蒙允許其

於平均公正之道萬一其庶幾而良丁之數從此可敷矣然以其不利於士夫臧獲之數故罵詈之至何可盡言當初定制之時盡自己酉正月以後所產屬之於公其所生方在襁褓死生之間不甚有無而猶且愛惜造謗如此況其稍長可使之時則其詆訶當如何也

補肅宗元年教曰奴婢既已竭力圖贖其子女若又還屬公賤則實為可矜公私賤理無異同所當一體從良令廟堂議之備局請依受教及己酉新定式回移各道奴婢所生已贖者奴之舊主如復濫侵依壓

良法禁斷

補三年李正英遙啓乙未推刷時寺奴娶私賤所生子枝贖良於其妻上典後從父役仍屬公賤者孝宗朝受教中以為此輩竭力圖免私賤而還屬公賤則實為可矜前後寺奴娶私賤贖其子女為良者並勿還屬公賤事傳教矣其後孟冑端為忠清監司時啓聞以為公賤贖良子女並從良役則公私賤宜無異同私賤亦為一體施行事蒙允矣只言前後則所謂前者無定限只以勿論前後為受教而無定限則百年以來其祖先贖良者皆將背其本主而訟端亦將

以此紛紜其受教則雖難有所撓改今若以十年為限更為定式似為便當而事係變通問于大臣處之何如上曰後日登對時稟處可也

補教曰嶺南民役果極偏重庚辛逃故奴婢自乙卯至丁巳生年身貢特為仍減以示軫恤之意○又下教曰雖有不均之弊乙丙兩年逃故未納及丁巳條一併蕩減

補四年憲府啓曰內司本非王者無私之道而近來叛主奴婢投屬者甚多訟必見屈屈必治罪以致投屬日滋寃屈莫伸日者幼學鄭后望之奴良妻所生

其為內婢所生終無可證之地該曹據此斷決以出給之意上達則以依前施行判下臣取考文案曲直昭然不意聖明之世有此舉措也請寢依前施行之命大臣許積亦遙白從之

○補宗室柁兄弟恃恩驕恣橫奪人臧獲數百口凡七易訟官不敢決方伯歸之盈德縣令金世昂一閱案立還本主柁家人出不遜語世昂抵其罪幾死一境稱頌

○補六年以兩界官妓率畜者作事目嚴禁上曰左相則老病中旁無扶護之人一官妓刷還與否無甚關

緊此則勿為舉論

主相即
鄭知和

補七年李翱送啓奴婢買賣法典內自有定限而中間奸細之輩或有既賣還匿之弊故相臣李景奭欲防其弊陳達於榻前買得之人如或見失則雖年久過限之後還徵本主事定奪厥後因循已成規例貪人雖欲賣奴婢恐有後弊不得出賣資生以此頗有惡言似當有限節之道矣上曰令廟堂叅酌定限補十年各道驛奴娶良妻所生自顯宗已百從母許良後自壬子年男為驛吏女為驛女驛吏娶公賤所生自顯宗甲辰男女並從母役事定奪

補十一年漢城府啓曰公私賤免者必出補充隊帖
文照後方屬良役自是法典而未知自何時因循廢
闕矣辛酉年朝家別樣申飭頒布事目以壬戌十二
月為限限前未及告狀者許人陳告還賤其後又為
退限於甲子六月晦前而厥後亦多漏落今因弭牌
之舉公私賤贖良又出補充隊帖文之人現出者甚
多今若依前日事目一功還賤則亦甚重難故本府
方以此類別修成冊以待朝家處置矣既不能一功
還賤則依他例為先成給從良本牌其成冊移送于
賑恤廳使之補充隊帖文成給以補賑資似為得宜

從之

補十二年領議政金壽恒啓曰大王姓孫則雖是西北奴婢仍隸賤籍事涉未安他奴婢則大王姓孫六代以上無贖身從良七代以下代口許贖異姓孫則限六代代口許贖乃是法例六代以上則自是應為受爵之人雖西北奴婢亦當一體無贖身從良而七代以下亦依他奴婢不限代數代口許贖或以為太無限節但西北人物雖許其贖良俾不得移本土雖是贖良之人七代以下自當充定相當役似不違於祖宗朝實邊之本意矣上曰依他道一體許贖可也

補十三年侍讀官朴泰輔啓曰大典賤妾子女條註
自己婢妾婢所生外皆贖身據此則自己婢妾婢所
生無可贖之處乃是胎生良人而嘉靖甲寅受教骨
肉相殘不得使嘍之法本不在法典凡決訟之際每
委屬甚為未便然同生四寸之相為使嘍固妨人倫
其身尚在賤籍則不可以同生四寸之不能使嘍遽
為免賤為良但於經濟六典贖集曰祖父婢妾產不
可專以奴婢例役使云同生四寸雖不可使嘍至於
五六寸則親屬漸遠使嘍固無不可依放役奴婢例
自五寸役使以為便當據此則祖父婢妾產未得為

良人而可以待其屬踈而復使嘯也唯此二文相為
抵牾故無知小民爭訟紛紜而決之者亦或主大典
或主受教無復定法頃年朝廷知有此弊頗加變通
而又以不得補充隊則許其族屬使嘯為斷故此法
終不明白而訟端猶未止息矣夫大典所載文簡而
意該無可疑者而受教之辭誠有不可深曉者祖父
婢妾產脫胎之日便是良人焉有所謂尚在賤籍者
而但依放役則不得使嘯至其子孫則復可為奴婢
乎嫡庶雖有貴賤均是血屬後屬雖頗踈遠猶有服
制奴主之名何得以復容於其間乎至於補充隊則

別是一法其有不屬補充隊則自有當施之律雖誅之可也流之可也烏可以使人奴其親屬以壞亂生民之大倫哉伏願更令廟堂詳加商確深明大典之本意以息無窮之訟端幸甚上曰令廟堂稟處可也補領議政南九萬遙啓自己婢妾子限內不出補充隊帖文者雖依法典還賤勿許還為嫡族之奴婢而沒入公賤事既已稟旨定式矣但其嫡族若因其不得使噴結嫌發告沒為公賤則其傷倫之弊無異於許為其奴婢因他事現發者外凡其遠近嫡族之陳告者勿施事亦為定式似當且連二代良役者不得

還賤事在六十年前非當時現存者不許聽理亦是
法文婢妾子孫雖無帖文若在此二條則亦不得沒
入公賤事定式何如上曰大臣所達誠是依此為之
可也

①補十九年兵判陸昌明逕啓驛奴娶公私賤所生並
為屬驛者為慮驛路之殘敝而驛奴婢事目前後甚
夥驛奴之娶公私賤所生及驛婢之嫁公私賤所生
皆令屬驛而其中驛奴之娶他驛女所生不為舉論
故兩驛有相爭之處明白定式然後可無互爭之患
矣驛婢之嫁他驛奴所生固無可論而驛女與驛婢

有異驛女嫁良夫所生便為良人則驛女有同良女驛女嫁驛奴所生似當從夫役矣上曰從父役事定式施行

補二十一年應教閔鎮周逵啓己酉年因先正臣宋時烈所建白公私賤良妻所生并許從良矣及至庚午年謂是宋時烈之法而罷之其已付良役者則因為從良而其未付者則還屬國之於民惟信最貴而此事失信莫甚豈非慨然者乎至於北路良賤之別尤非他道之比自有還賤之舉或棄絕已娶之妻其子女亦不能與良人婚嫁其所呼寃有不可勝言從

良之法雖不可復行若自己酉至庚午所生毋論答役未答役一并從良辛未以後所生皆令還賤則國無失信之事而民無呼冤之弊矣左副承旨尹德駿曰國法數變民不知所從又有大段傷損處不但失信之為未安從毋從良之法初定於己酉而戊午年間變改己巳年又變庚午年又變以其良賤及年月之爭至於奴主相訟其為傷風教者亦大矣今宜一定其法以為永久遵之地矣良役與否之分別還為小曲折矣上曰令廟堂稟處可也

補二十五年持平尹憲柱還啓公賤之屬不得許良

法禁至嚴至於外方官奴婢則役名尤重不可輕許
免賤免役而近來法網鮮弛率畜官婢之類皆以巧
法頌免以致賤籍日縮使役漸艱請令諸道監司嚴
查各邑免役之類一一刷還此後則免賤免役一切
禁斷事定式施行從之

②補二十六年選臣尹趾仁所啓北關有雇工之法自
儒品至於官奴婢皆許成給立案便作己奴而募其
土風獷悍強戾凡所使役極其殘酷非但任意刑杖
多有過濫至於黥劓之刑邦憲所無而北路之人乃
敢私行於所率雇工是以雇工輩不堪於其主人之

虐使逃匿者相續雖以今番犯越人見之亦是曾所
割鼻者也其犯入彼境殊極可駭未必不由於反主
而大凡為人雇傭之類若有迫急之事則其所圖免
何所不至此民之許給雇工既是祖宗朝舊令而今
不可變通若其虐使黥劓之弊不可不嚴加禁斷矣
上曰令本道嚴禁可也

補三十年賑恤堂上閔鎮厚奏曰外方監賑節目則
設粥飢民收養過六十日者方為成給立案十三歲
以下並子孫作奴婢十四歲以上限其身作奴婢京
廳則堂上親自檢察事體與外方有間收養四十日

以上者十五歲以下並子孫作奴婢十六歲以上限其身作奴婢收養四十日以下者勿論壯弱限其身作奴婢恐宜矣從之

補三十一年右議政李濡逵啓濟州之人私賤居多士夫家奴婢或因其官負之稱念徵貢之弊不絕或放賣於本土之人則侵虐之端尤不能支當若依北道之例自朝家給價於本主買作公賤則在本主反有所利作為公賤以除被侵之苦而仍屬軍伍則可以安保平生緩急得力聞本州所在公賤則雖是內司奴婢一年所納之貢不過二斗之米故皆以為便

云令該曹依此為之似好矣

補三十七年備局啓曰西北兩道則法意比他道尤重雖其應為免賤免役之類自前只除賤案不應官役而已不得移其本土而近來則舉皆任意率來此尤可駭納物免役之類亦有不費其錢財憑藉官力或補軍器備納或補賑資補用或補推刷陳告巧作諸般名目而夤緣圖得者又有元不免賤免役而請囑本官公然率去者以朝官而犯此科者固屬違法而幕屬衙客驛胥鄉品之徒猶且肆然率畜以致邦禁不行官屬日縮事極寒心不可不更為別樣嚴飭

矣已卯以後納物陳告免賤者及冒稱族屬而免賤
免役者假托役名而不立役者令該曹該院本官一
一查出並與其率畜者姓名懸錄成冊上送本司以
為刻期下送還賤還役之地而若其元不納物之類
則不必定其年限毋論久近一體刷還宮屬驛屬雖
不在前日臺論中亦當一體查出而凡諸冒法率畜
不卽還送者卽送而旋為率來者及監司守令之掩
置不報者雖報而不卽刷還並依法科罪西北則不
為還賤還役者與已卯以上所不查覈者並令刷還
本土成冊上送宜當以此分付何如從之

補三十九年知事閔鎮厚遙啓私奴叛主連二代良役者以良民施行乃是國法而故相臣鄭太和以爲所謂二代卽指終身應軍役者而其始爲投屬及目今立訟者不當入於代數之中若並計投屬與立役者則實爲四代云臣於待罪刑官之日親聞老律官之傳此言凡於聽訟之際輒用此例矣但此無明文故外方不能知之雖年不多父子入屬軍役則皆稱以連二代良役而決給云不可無定式分付通行京外之道矣上曰其言是矣以此定式使京外遵行可也

補四十四年內侍奴婢納米免賤後因戶判權尚游
所啓所納代口三年內或有逃躲之弊則卽為還賤
事定奪

補景宗元年戶曹判書閔鎮遠啓曰外方各營各邑
奴婢不足故每每狀請自朝家劃給各司奴婢國用
之漸縮亦由於斯矣伏聞各營各邑官奴婢良妻所
生無不落漏閑遊守令雖欲依法典刷出畏其怨謗
之朋興仍以置之坊不刷出而輒稱使喚苟簡請得
寺奴婢殊極不當自己酉至甲寅奴良妻所生雖許
從良其餘所當一一刷出使役以此嚴飭諸道使之

明查推現俾無使嗔不足之患何如從之

補英宗二年平安監司洪錫輔遙啓官妓率畜之風未有甚於近日其在清朝治體必可禁而不可已者也向者憲臣之啓出於飭名檢勵風俗之意旣已蒙允頒令之後間有不卽下送甚至於奔走經營圖為巧脫者有之今日朝廷少有紀綱豈容若是所謂納價免賤代婢免賤補賑免賤陳告免賤等名目無非假借虛張之事更為嚴飭如此之類使各其邑一一還刷錄案如有慢視朝令不卽督還者則率畜人並以從重論罪尚方針線婢元額百餘名內二十名立

役其餘則無非憑藉率畜在京納貢之類立役二十名外盡為還送自各其邑年年收貢上送之意自該院發關知委於各其所在邑事分付何如

補五年禮曹叅判宋寅明逕啓官妓刷還事臣意只欲還刷其官妓一身而已其所產則既已男婚女嫁有不可一例刷還今聞諸道守令並其所產而盡為刷還反致騷擾此則似宜有分揀之道上曰官妓外其子孫則雖一體刷還而還賤則勿論可也

補教曰凡奴婢之貢本無一規或清或錢或油或木或苧布或麻布或紙或米此乃與任土作貢一般矣

且其來已久非今勦始而已近年以來民訐日甚奴婢輩敢生僥倖之計已極無據而況身為內奴婢與民有間則渠敢以具姓名呈議送欲望杖聞乎此路一開內奴婢與各司奴婢之不去姓懸案將此始矣公私賤必補良人之弊從此而必起焉有傷風教莫甚於此今本道並嚴刑一次以勵風俗

六年命定公私賤娶良妻所生男女並從母之役

補右議政趙文命遙奏奴婢世傳乃中國所無之法昉自麗朝其來已久今雖難革至於奴良妻從父役則尤是偏私不公之甚者良丁漸縮賤籍增繁已非

國家之利而私奴之娶私婢為妻者費私財贖其妻
子於婢之主則奴之主又以良妻之產而役屬之雖
有贖之名終不得為良此又冤痛迫足以感傷和
氣昔在顯廟己酉年間先正臣宋時烈建白令當年
十一月初一日以後公私賤娶良妻所生從母役為
良其後乙卯許積以時烈之法而白革之辛酉故相
臣金壽恒閔鼎重建請復行己巳睦來善復請罷之
法之因革隨時翻覆而大抵從父役所私利故甲戌
以後因循不復遂至于今若使己酉之法至今不罷
則其間國家所獲良丁不知為幾十萬而黨論病國

卒未食效今若斷自宸衷特倣己酉之制今於今年
某月日以後所生悉從母役則行之數年可得良丁
累十萬其為經遠之利已不勝言而目前亦可以消
怨氣而道和祥矣上曰今聞御史

京畿御史金尚星

遙達

則良民日縮專由於此不可以些少之弊忽於大體
之是自今年所生定為令甲毋論公私賤使從母役
補七年大司成宋真明遙啓奴良妻所生從母役事
頃日臣上疏請改以辛亥正月初一日而仍陳男役
父女從母之法蓋欲其久行而不廢也自廟堂回啓
方入而首相有持難之意故置之隸院啓下公事尚

未行會事甚未安敢達上曰首相之持難者何意耶
領議政洪致中曰奴良妻所生從母役既有成命而
此法之無弊久行有未可必故宋真明之為此議不
為無見廟堂亦此構草覆啓而臣意終有持難者欲
一陳達於筵中而未果矣上曰回啓中許之乎不從
乎致中曰回啓措語則欲許施而以今日時勢國綱
只當遵守舊行如有大段窒碍處則稍加變通而已
若創出新法則後弊必多矣賤人從母役自是大典
法故雖稚駮無識之輩皆知其母為公賤則渠亦為
公賤其母為私賤則渠亦為私賤今若一朝遽創新

法一母所生而各異其主則前頭名分之不嚴爭訟之紛紜必有不勝其弊者矣不但臣意為然外議亦多如此此法恐不可行矣上曰凡事自有經權矣從母役固為經常之法而未稍有奴良妻從父役之法公私賤無不皆然其弊不貲而昨年石相陳達之際予猶為持難矣金尚翼以為不去此弊則將無良役之人故予非不知有弊而許之矣宰相又有男從父役女從母役之請故並與鑄錢事而令廟堂稟處矣宰相固有深思者且有懷必達亦無不可而聞其回啓許施云朝以從母役為便暮以從父役為便廟堂

之梳攘未定如此誠為可悶領相之持難固矣只當
依前教舉行若有弊端更為變通可也

補九年刑曹叅判李真淳筵啓近來西北人買去京
城奴婢其弊難防至有轉賣彼人之事故捕廳啓達
搜捕干犯人移送本曹者其數亦多其中盜賣良人
及招引私賤偽成文券者自當依律重繩而其間不
無有主婢買得文券來歷分明者不可一例定罪且
北人買去人物者朝家既以一律論斷而西土人買
去者曾無嚴令自今定式依北道例嚴防似宜矣上
曰西路異於北道然西路之招引人物者依北道例

照律而有主奴婢兩相買賣者豈可一併防塞乎

補十三年右副承旨南泰溫遙啓外方無依之民厭避良役多有投入於鄉品官率戶而土豪之武斷者隱接籬下公然漏籍終作自己之奴僕此實民間之蠹也為守令者雖欲摘發其勢末由良丁漸耗亦由於此似當有各別嚴飭之道矣上曰所達是矣此事究其本則誠可憫然貧殘之民依托土豪為土豪者喜於使役受其投托故既入之後終不得免仍為其家之奴僕此不可不各別嚴禁出舉條申飭可也

補十四年右議政宋寅明遙啓我國奴婢法自箕子

八條已有之麗祖祖訓以此為重麗末識者以奴婢之法壞為其將亡之乖矣近來貧窮兩班推奴者多有非理之事此所以每當災年必禁推奴誠出於便民安業之意而奴婢之法曰此漸壞甚至於奴殺主之變而外方恬然不知其關係綱常此亦可慮戊申之變逆賊多出於兩班故其後便為常漢詬辱兩班之口實外方名分日漸掃地云亦非細慮矣臣於日前籌司之坐見有喪人姓趙者呈狀狀辭中以為渠家祖子孫三代一時見殺於奴屬賊徒而賊徒見捉於忠州鎮營幾皆取服而尚不正法未得復讐云云

見其狀辭極為驚慘而或慮一邊之言有不可信矣
追聞本道道臣曾以此獄事有狀啓下刑曹覆奏者
云故今日推來文書於刑曹而見之則忠州鎮營果
有盜賊按治事而其結黨明火賊殺趙哥兩班祖子
孫三代之狀箇箇直招同黨多人中幾皆承款而只
因一二人之頑忍不服尚未正刑云矣其時所謂盜
賊同黨中有擊錚者而原情在刑曹故亦見之自謂
非趙哥奴屬其言何足取信雖未知事實之如何而
或果為奴殺主之變如道臣狀辭則當為三省罪人
多人既皆取服明白則何可以一二人之不服而一

向淹延容其偃息耶宜令本道道臣取見文案明是奴屬而果為賊殺則即為具格啓聞以為發遣御史推覈後依法三省舉行之地仍以嚴名分正風俗之意別為嚴飭於道臣何如上曰依為之

⑧補十八年領議政金在魯遙啓北評事又以為玄歲救活者仍作奴婢曾有朝家已行之例永行奴婢雖或為難今若以自歲前救活者限已身使役自二三月救活者限十年使役事作為定式自賑廳成給立案則六鎮民人之有穀物而無奴僕者必將率活云此事既有前節目且有益於一分活民依施何如上

曰依為之

補教曰救活飢民永作奴婢此事何如北路有此規
耶右叅贊朴文秀曰臣己未年入往六鎮則丁巳大
凶時救活飢民作為奴婢者甚多矣時有路傍泣訴
者詳問其由則皆曰急於目前之飢未免為他人之
奴婢父則為奴於東村母則為婢於北里妻與子女
亦然如此哀痛之情事深察而願免奴婢云故臣其
時不勝慘傷以此具由狀聞矣大抵北路風俗無狀
奴婢傭作少有不順則縛以懸之以綿火擗其足此
何忍堪乎此事許之殘忍不許則亦當死宜有以商

量處之矣左議政宋寅明曰前頭贖還則好矣今則不可不許之也茅恐臣等未必長居廟堂則贖還事或致緯繡矣上曰於予心有所如何矣右議政趙顯命曰或限以六七年後還贖則好矣上曰若能為之則豐原所達是矣修撰李成中曰既許作奴婢之後又為贖還則恐歸欺民之科且此事易於忘却宜有以各別商量之道矣文秀曰此則小臣當勿忘之矣上曰直捧成丹置之備局此亦別為舉條以付備局可也

二十一年定嶺南寺奴婢比揔之法

時審理使金尚迪自嶺南還盛陳諸寺奴婢推刷
加現之弊仍請永為貢捻俾無每年侵擾之端自
上俯詢廟堂而行之甲申又因戶判具允明建白
兩湖亦依嶺南例定捻施行

補續大典 大王姓孫六代以上無贖身從良七代
至九代代口續身外孫六代以上代口贖身七代以
下勿論應贖者上言則掌隸院先移文敦寧府宗簿
寺詳考其代數後回啓四王子孫從良受教孝宗朝
乙未以後勿施○功臣娶公賤所生並許為良東西
班三品正職軍職僉使之類不在此例之子與孫曾經吏兵曹司

諫院司憲府弘文館都摠府宣傳官之子娶公賤所
生許令代口贖身士族朝官者之子與孫嫡妻無後
當以公賤所生承重者明查得實亦許代口贖身而
西北公賤依法勿許

雖是西北公賤大
王姓孫則許贖

○娶妻婢所

生子女依大典妻婢所生例無贖身從良○各司奴
婢每式年推刷內奴婢則限十年推刷各衙門京奴
婢生產物故其司直報漢城府歲抄啓聞逃亡已過
三十年者續案磨勘時可據文書上送該曹憑考頒
下○奴婢所生六口實役者其父母俱是公賤則免
一口三口實役者父母免貢雖父母俱沒之後五口

實役者一人免貢十人實役者二人免貢軍功納粟
免賤免役免貢者非啓下公文則勿施○陳告逃漏
奴婢每六口賞一口三十口以上則公賤免賤私賤
以公賤給代免賤五口以下則給所告奴婢三年身
貢北道奴婢陳告者以他道奴婢賞之無時陳告者
一功防塞式年始許陳告而守令親覈虛實施以賞
罰凡逃漏現出之數每歲抄啓聞○功名賜牌奴婢
則以寺奴婢丘史則以官奴婢宮家賜牌以寺奴婢
定給官奴婢則一功勿許○公私賤背本主本官授
托內需寺者限己身沒為邊邑官奴○成均館四學

鄉校及奉常寺奴婢勿許免賤雖有免賤之勞論以
他賞○官奴婢移屬諸司者禁斷還罷官婢依法贖
身免役外作妄率畜者嚴立科條刷還還賤○驛奴
娶公私賤所生男從父役女從母役內司婢嫁驛奴
所生勿為屬驛○一應屬公奴婢觀察使歲抄小名
啓聞京各司屬奴婢小名亦移文本曹並置簿檢舉
○私賤隱漏奴婢推尋者雖累年之後只徵三年身
貢○京人及他道人之北道及關西奴婢只收身貢
毋得率來使喚一切勿許買賣潛相買賣者燒其文
券勿施○不告官擅殺奴婢者用大明律杖徒之法

而如當房人口悉放從良之文勿用○公賤代口贖
身者所代奴婢累式年戶籍相考名付的實然後以
年歲相當者計口以奴代奴以婢代婢○寺奴婢娶
私賤所生贖良於妻上典者私賤子女之贖良於母
上典者並許良於父上典勤作奴婢者以壓良為賤
律論○相訟奴婢兩邊不當者屬公○內奴婢入宣
頭案驛奴婢入形止案而稱以本主推尋者用小限
事在三十年以前則勿聽若反主投屬本主相訟得
決而逃避過三十年者不可以過限論用六十年大
限○或稱祖上逃奴婢或稱奴良妻所生爭訟而非

當身現存者用大限事在六十年以前則勿聽事在六十年以前連三代良役者雖自己奴婢亦勿聽

補領議政金在魯逕啓審理事又陳各司奴婢雖有真箇逃故該司以無所加現終不許頒故年過百歲者尚在於收貢之案年年侵徵害及隣族若其奴婢年過六十而明白物故有公文者勿論加現與否一併減貢事仰請而有稟處之命矣年滿六十則雖非物故自當老除此亦依所達許施宜矣右副承旨趙榮國曰此是王政之所不忍既知此弊則雖或有見欺之慮豈不思所以變通之道乎左議政宋寅明曰

此宜許施矣上曰依為之

補兵曹判書鄭羽良筵啓以賤為良卽王政之造化
乃賞典之重者也近來從自願免賤日益甚焉往年
關西道臣覈其偽而狀聞是也以此之故猥濫自滋
官婢代充弊及無故此豈王政之宜然其人在賤役
從舊例免賤其亦王政之義事不可遽塞此例而欲
祛此弊亦不過一號令事此後則受免賤之帖呈隸
院而入啓也亦勿依前循私先考京外帳籍應許免
賤入啓許施詐偽猥濫者直為勿施以杜奸弊而其
若復踵前習循私入啓者京則該院堂上外則當該

道臣守令隨現重律事定式施行

補二十五年領議政金在魯所達此卽慶尚監司南
恭良狀啓也舊則公私賤良妻所生從父役為公私
賤矣庚戌年新定式公私賤良妻所生並令從母役
為良而自辛亥正月初一日子時以後所生而始行
矣昨年掌隸院以奴良妻所生從良者修成冊以報
本院以為除良之地而補充隊贖錢亦令督捧上送
故今此狀啓以為辛亥以後生產自多一家之內當
納者多或四十兩小不下十餘兩如此凶歲萬無徵
捧之勢此非時急之事姑勿督迫特為安徐從自願

輸送事請令廟堂稟處矣此則嶺伯所請猶未詳朝
家法意矣凡補充隊者乃以賤人贖良之名也奴良
妻所生朝家既有從母為良之命則落地之初已為
良人而真俗所謂天生良民也初無補充隊可出之
意掌隸院之督令納錢受去非矣奴良妻所生勿出
補充隊直為良人之意明白分付何如

補二十八年左議政李天輔所啓此是嶺南御史別
單也寺奴婢之比摠極涉苟簡年分比摠其弊猶大
况人口之逐年增減本無定數者乎向來設為此法
盖因推刷之痼弊為一時姑息之計而行之已久中

經飢饉癘疫人口增減邑各不同道臣不為通一道

推移比摠而用一坊之法邑比摠則其為弊反有

甚於推刷矣金尚魯

時左議政

曰嶺南寺奴婢視他道最

多故其為弊比諸他道固有紀極前後說此弊者不
為不多而終無善變通之道人口比摠非不苟簡而
頃年朝家之行此政出於下策然當初比摠之意蓋
欲令道臣通一道周察推移減於彼者增於此要之
大體不失於比摠元數而已其後道臣不善舉行只
使邑邑逐年比摠殆同良額代定則道比摠反為邑
比摠此與節目本意大相逕庭其弊安得不有加於

推刷之時乎今若罷此摠之法而無他可救之策則
將使推刷加括之政依舊復行此亦重難矣李天輔
曰朝家設法本意則蓋欲通一道此摠而道臣不能
深察各邑增減之實狀且雖欲移劃有勢力守令力
拒不受故道臣難於取捨一向因循其弊如此今欲
革罷此法則別無揀弊之策不過依前推刷而已豈
不可行乎至於各鎮防布搜納一欸似為兩便之道
本道與戶曹往復從長變通為之無妨而若自朝家
定式分付則事面甚苟且矣

補傳曰噫歲將暮矣惟昔興感豈有何心然夙夜眷

眷惟在元元噫豈惟我心寔體于昔噫奴婢之名三代漢唐所無在於我國吁嗟寺奴婢其亦吾民也每聞嶺南寺奴婢事不覺淚下矣其於比摠已無其效所謂揀弊亦非善策噫其捧不過度之玄木而使節屋寺奴寺婢老而無妻老而無夫此豈王政之所忍吁嗟股肱備局諸宰消詳講究善而處之使我無妻之民有妻無夫之民有夫於彰義宮有義城寺奴婢彰義宮若仍存度之何以捧一匹今因處分將歸於度之此數十口寺奴婢其所同歸於無訴之民余甚惻然今雖不減之又何忍加數分付該曹講確前

特為減布以示愍惻之意

補三十年刑曹判書李昂輔所達本曹雖掌刑獄亦主管公私賤有隸一房屬京司奴婢有隸二房屬外方奴婢每當式年各邑推刷奴婢上送續案則自本曹生產物故免賤免役之類一一磨準分送於掌隸院及戶曹矣頃因湖南釐正使李成中書啓謂有許多民弊自備局亦以本曹續案不緊並與諸道續案之永罷覆啓此非當初設官掌隸之意若無續案則公賤之弄奸耗縮無以覈出一依前例諸道續案並令還付於本曹事下詢大臣而處之何如領議政李

天輔曰初因李成中書啓以永罷回啓矣追後思之
刑曹初不掌奴婢則已不然則續案不可不報本曹
而正案上送之時民弊甚多此後則使各道監司收
聚各邑續案直送本曹而本曹若憑藉文書之有頃
推捉各邑該吏則其弊亦不可不念文書雖或有頃
直為往復於本道監營使之釐正俾無推捉各邑該
吏之弊以為定式似好矣令曰依為之

三十一年命減內寺奴婢貢納數御製綸音曰噫國
之巨弊一則良役一則奴婢良役非徒隣族受弊甚
至於徵白骨奴婢其弊尤甚男不能娶女不能嫁是

豈咸恒所云有男女然後有夫婦有夫婦然後有父子之意哉吁嗟寺奴婢生於世而無咸恒之道既無咸恒之道有何父子之理非徒王政之不忍亦感傷和氣之端良役既已減布而寺奴婢今不釐正更待何日不顧衰暮先下減令奴則減定一匹婢則減定半匹噫自此以後奴婢庶幾少蘓矣其令永久遵行莫替予暮年勤懇之意

舊制奴婢自十六歲出貢至六十一歲老除而每奴收木綿二匹婢收一匹半顯宗丁未因玉堂李端夏疏命各減半英宗己巳因戶判朴文秀陳達

命特減其閏朔加貢之數至是年又定各貢減半之法

各司奴婢實數

並屬戶曹

京畿貢奴一百八十四婢

一百七忠清道貢奴六百九十三婢三百八十三
全羅道貢奴七百三十五婢四百九十二慶尚道
貢奴七千八百八十三婢一萬三百二十七黃海
道貢奴二十三婢十一江原道貢奴一百七婢一
百二十一平安道貢奴二千二百三十三婢三千
七十三咸鏡道貢奴四千三婢九百三十九

○補三十五年教曰雖應坐之類名係璿沘者勿為奴

婢事一體受教

補四十年革罷掌隸院還屬刑曹所掌

補四十二年領議政洪鳳漢所啓上年前戶曹判書具允明以奴婢事曾有陳達於遙中者其略以為寺奴婢逃故誠一痼弊春間代定之下教實是軫念弊端之聖意而流來舊頃不可一並代定若以今年為始則從前執貢之類並將頃減此亦可悶諸道亦用嶺南之例以庚午中年比揔庚午以後移屬及籍沒奴婢一體比揔自廟堂成節目施行云云自上廟堂更稟之教矣奴婢異於軍丁及田細所謂比揔似

若掣碍而其實則乃周便之政也蓋以近來痼弊言之某邑奴婢或真箇身死或真箇散亡而戶曹閱其貢縮不即頒下某邑奴婢或真箇生產或真箇還集而本官慮其後弊不為查報京外互相欺疑以致許多姦弊此所以有嶺南北摠之法也所謂北摠非逐邑北摠即道臣舉一道而通融濶挾當頃處頃之當括處括之有減有加移彼補此使其納貢之數年年相等也如此之際豈無元定外餘數而此則以寧失於下之意置而不問論其作法之意豈不為寬緩不迫而執褊沮事之見輒生參差之異議明知其為便

民則固當遵守之不暇何可撓於不深知之浮議乎
又況行之數十年有效無弊到今諸道矯揉之策莫
知遵用嶺南之此法矣湖南湖西亦令比摠而所謂
庚午即甲戌奴婢貢給代時折衷之摠以此年為準
不必別成節目亦以嶺南節目遵行事分付何如上
曰依為之

補五十年三月革罷婢貢之法先是上以為我國奴
婢之法初自箕聖然箕聖特設此以禁竊盜而已初
非使之世世子孫長為奴婢也又况租庸調之法男
有役而女無役今奴婢並役甚無謂也三十一年命

減奴貢一疋婢貢半疋至是命婢貢勿論寺驛公私
賤悉革之其所需經用以穀代充

東國文獻備考卷之一百七十六



